



元憲集卷二十七

內制

中書試戒風俗奢靡詔

宋

宋

庠

撰

聞夫古先哲王之御俗也皆上求天心下建民極天道
貴質故敦本以化元民情易流必閑邪而制法然後能
趨富壽之域開衣食之源至龢來臻大命無泛國家荷
三聖之業保萬方之大容典飭盡訓戒諄勤然而世道
久夷人心多靡近聞中外頗僭典常自通邑名都世家

豪姓競作浮侈迭相矜尚珠玉被于服玩緹繡裹于垣
牆雕幾歲更規矩時易醬藿庖味山藻室廬靡嗟民力
之勤罔憚邦儀之禁此而是縱孰不可容況曩者神宗
親駕農祠示稼穡之重真廟深惜上幣嚴銷塗之律朕
皆祗紹祖武奉行前猷惟爾庶邦敢忘茂訓自時以往
咸俾改爲儻輕蹈于匪彝當一施于重罰布告遐邇知
朕意焉

敕州郡勸農詔

昔者堯湯之災而民不病知備故也禹稷之盛而身服

勞知本故也惟本與備一出于農哲王盡心義在于此
矧去聖愈邈務本日衰非告以話言納之善道則懼夫
懈怠之俗相靡而弗還富壽之期因循而莫復朕所以
躬紹祖武親禮農祠御千畝之場越三推之數因以申
勞狎野優復力田招來太和茂育羣品則號公諫宣之
旨賈誼勸文之戒朕雖不德庶或無慙而今春以來善
氣猶鬱蝗羽爲孽雨足屯膏南自淮楚而接之江東綿
齊魯而著之海野乏青草家無見糧丁壯輕去于里廬
細弱相捐于溝壑曾未周歲奄及大饑至于邦縣之間

率寡京坻之蓄教不先具民亦何辜庸非貪吏以培克而奪其財苛人以趨辦而窮其力淫巧游惰者失其禁逮訊證捕者妨其時使吾赤子陷于饑寒嘉歲變于機肯興言及此朕甚痛之況視民之勤禮存彛訓墾田罔實漢有明誅自今以還其申勅詔條切督州郡凡令之出以農爲先謹視土膏之宜明宣稼政之目諭以國家寶穀重食尊本鎮浮庶幾流亡有所底止敢或弛厥稽事重爲民殃當一寘于重科俾大變于衰俗布告天下知朕意焉

舉遺逸詔

王者稽若大猷總制羣品曷常不求輔于有衆收績于無爲張軒冕之華以來世彥厚丘園之禮以聘道真然後教化尊于朝風俗清于野琮璜入于東序鸞鷲集乎西靡天無曠工祿必配德自淳政不競茲舉寢衰招延者罔汰于濫竽苟冒者希聲于畫餅使賢人志士穢世嫉邪蓄高韻于無聲韜奇文而滅彩築巖釣渭無復嗣音加璧裏輪遂成絕典寧所繇之殊路將可復而在人朕荷祖宗之靈託元元之上永惟大本非賢罔濟比詔

執事博訪異人驚精鳴鶴之阜馳心白駒之谷歷祀綿
久希風寂寥將朝廷禮意之未臻有司物色而乖當何
區域之大而賢才之寡歟抑又聞之蘭菊高芬多挺生
于幽藪隋和善價不自納于買區緬惟高尚之蹤固非
科級之致宜令郡邑深體眷勤其或求志于里閭抗情
于丘壑樂篆素以希古葆孝悌而道榮有一于茲且以
名上朕將敕公車之府備鵠版之書虚心望風待以不
次庶幾皇士同獎大寧傳不云乎舉逸民天下之民歸
心焉咨爾羣倫毋忽余意

賜南京留司文武百官尚書吏部侍郎知應天府
韓億等賀南郊禮畢及上尊號受冊詔
欽崇報本禮重邦經刻玉崇號義緣人欲內循寡德忝
舉鴻儀膺福享名心焉增愧卿近由丞弼方委保釐率
屬罄恭露章馳賀味其辭旨忠恪兼勤欣歎之懷寤寐
無舍

賜西京留司文武百官資政殿學士尚書吏部侍
郎知河南府范雍等賀南郊禮畢詔

長景涓辰高禋措事獲膺純嘏還霈茂恩三靈交歡咸

與欣會卿屬司留鑰虔戒乃僚便道奉章旅辭致慶情
文參允將順並照申閱于茲歎矚何已

寶元元年南郊御札勅內外文武臣僚等

夫一陽大報方冊彛規三歲親郊祖宗盛則朕猥以涼
菲獲承基緒祇率丕訓茂昭前人兢兢業業罔或寧暇
賴上穹鑒祐列聖保綏方隅晏然氣物時若民微艱食
之阻邦輯阜財之經嗣洽太和莫非靈貺雖復犧幣有
品粢芼載蠲申勅祠官謹修歲事然齋輅停軫欽柴輟
熏弗躬于行撫己成闕祭疎則怠心焉增惕矧紫營在

望奚敢憚勤黃流並裸庶幾能饗爰諏景至之吉恭迓
帝臨之休慎舉鴻儀式先誕告朕以今年十一月十八
日有事于南郊咨爾攸司各揚乃職凡所以供調毋黷
典常應諸道州府不得以進奉爲名別行科斂裕神約
禮稱朕意焉故茲札示想宜知悉

賜參卹政事程琳生日生餼詔

任參丞弼業總謨明出入再期周旋一德嘉聞誕日宴
啓世祥毗倚甫隆寵頒惟舊餼醪具品饗粢兼儲往資
合族之歡姑慶生賢之會所宜欽荷以對同寅

賜參知政事王巖生日詔

志局堅明材猷肅給氣筦斗樞之重移參鼎餽之和碩
畫所經大倫並輯眷言異稟實紀初辰嘉賢運之有開
宜恩頒之載渥樽醪且旨庖犧具將用昭禮食之華姑
集家庭之慶體余注賴往洽燕私

賜知樞密院夏守贇生日生餽詔

盟府舊勲樞庭新望告猷伊始備賜惟常矧秋籥之孟
辰紀慶弧之善旦特推蕃錫且志同寅往洽宴私諒欽
眷待

且志賜知樞密院盛度生日生餽詔

寵分齋鉞職筦朝樞動成密勿之猷居然俊乂之老生
賢胥會紀且有初方寄同寅固存異數牽醪腴旨麴粲
精良併資宴豆之華且慶門弧之吉允宜欽荷川對眷
懷

賜知樞密院王德用生日生餽詔

識洞武經世資忠槩能荷旗常之伐進參帷幄之謀造
膝有猷慎辭無玷曷茂疇于久職凡再易于中權命數
益隆志懷彌劭眷言異稟實紀初辰朝有慶儀禮兼飫

賜稻麴鑿品醪餼叢滋俾均合族之歡用志生賢之會
所宜欽受且表眷勤

賜同知樞密院陳執中生日生餼詔

茂承世範參筦朝樞年序未淹風猷載洽眷言異稟式
紀初辰宜昭侍幄之華追慶射蓬之會芳樽和旨庖具
珍盈姑示眷慈往欽蕃錫

負荷世猷彌綸機政迹乃生賢之運協余同德之休適
及誕辰乞昭慶物樽華芳旨庖齋珍腴往申宴豆之歡
且志門弧之吉體茲眷獎用克欽承

賜宰臣張士遜生日生餼詔

淵直宏才謨明舊老允服賚予之命實基生甫之祥曾
是季秋挺茲慶日拜儀有典賜品惟優宜因宴具之豐
尚續壽祺之永往欽異數用表同寅

賜武成軍節度使同中書門下平章事駙馬都尉

柴宗慶進謝賜生日禮物馬詔

卿媼近之華藩宣有寄屬始生之日用申蕃錫之恩
仍俾乃宗具將予好寵賢惟舊疏懇載勤仍效右牽之
良參抒中藏之感虔劬適禮愧尚交懷

賜鎮海軍節度使新授知樞密院夏守贊赴闕沿

路茶藥詔

卿甫膺節召入總機繁念稱妮以戒塗屬炎歎而在候
方滋渴竚宜謹綏調特命輕軒往頒茗劑所宜欽受姑
表眷懷

賜契丹賀正旦使蕭傅到貝州茶藥詔

卿奉將隣幣來慶王正肅邦禮以惟虔驚使程而匪懈
眷言次舍式戾方州不無鞅掌之勤且有綏調之助特
推優錫用集至和諒卽欽承且昭恩賚

賜契丹賀正旦副使韓志德到貝州茶藥詔

卿遠服使聯參修聘艱款邊關而適徃冒歲律之凄凝
緬是勤斯軫于勞止雜頒靈品助擁時休宜體眷懷卽
當祇荷

賜契丹國信使茶藥詔

肅持命節祇達朝言冒暑于行念勞云久夙宵良苦調
衛宜先特申藥茗之頒參資湯液之品祛煩蠲疾尚諒
眷懷

賜淮康軍節度使同中書門下平章事陳堯佐加

恩誥敕詔

卿儒苑上才槐階舊老茂分旄節陪我寰畿屬郊事之
 方竣冀靈休之普洽持敷明命參寵元侯具刻贊章往
 榮藩屏仍俾家庭之嗣奉將詔版之嚴萃厥恩私所宜
 祇荷

賜尚書工部郎中天章閣待制知同州司馬池爲
 澄城縣百姓党岫持刀刺殺親叔依條斬訖待罪
 特放詔

漢輔要邦秦餘舊俗化條所被恩種宜悛何茲悖德之

氓靡率懷音之教毒加親序汙我人倫卿適莅郡封載
 欽官獄恥聞凶類尋正嚴誅閉閣示愆露章引劾願任
 吏師之責益彰臣禮之恭觀過有來省躬奚咎勉興善
 政以牧吾民

賜資政殿大學士尚書左僕射判鄆州王曾乞南
 郊陪位不允詔

卿儒苑上才公槐雋老冠名秘殿均逸東藩雖挹道均
 冲而協恭無懈屬升禮之誕告遽刻贖以斯聞願肅朝
 鑾旅陪祠鬯然坐堂之政甫慰氓謠擁傳之勤重煩者

德宜輟甘泉之從姑紹潁川之良其在傾輸徒增歎矚
賜鎮海軍節度使知澶州夏守贊乞南郊陪位不
允詔

卿以擁節之嚴守夾河之重茂宣民政總訓師和有鄰
疆餞勞之煩有隄事繕完之備實惟勲舊鎮乃要衝會
郊報之在辰覽郵封而瀝懇願陪盛薦深體忠懷然職
在刺條地陪寰服宜切圭符之寄用紆朝宿之勤其在
歎嘉靡忘鑒寐

賜武成軍節度使同中書門下平章事駙馬都尉

柴宗慶乞朝覲上壽不允詔

卿皇室近姻重侯茂闕早持帥節兼視臺華擇分陝之
名區寄屏周之良翰會余慶節遽剡奏封願飭介圭之
朝因陪壽筭之獻誠雖輸嚮禮實重煩況任貢已列于
前撫封方倚于外宜綏闡政昭副朕懷眷是寅恭靡忘
嘉歎

賜刑部尚書知徐州李迪乞赴闕上壽不允詔

勅李迪省所上表乞暫赴闕隨班上壽事具悉卿久服
蓋臣游持魁柄曩當周衰之重移殿徐邦之雄克布惠

和以式方面雖甘棠流詠于陝服靈河蒙福于漢京樹
善相均配古無愧屬余誕節時閱奏封願集奉觴之辰
且紆戀闕之志然倚矚舊老倡率守麾風化所期內外
惟一無煩趨覲姑穆翰垣恭愛之誠歎賞徒切所請宜
不允故茲詔示想宜知悉夏熱卿比安好遣書指不多
及

賜護國軍節度使兼侍中張耆乞朝覲上壽不允

詔

卿倡牧元侯登樞舊德繼開大府實冠友邦屬我誕辰

願陪慶會雖奉觴攸竚而趨節爲勞姑穆翰垣式符眷
賴輸誠循禮徒用歎嘉

賜河陽三城節度使楊崇勳爲移知陳州乞朝覲
不允詔

卿早秉戎旄屢綏藩政民謠載路歲筦亟淹曩因宛道
之夷後徙淮陽之守隱然屏翰陪余京師遠閱囊封願
先載覲眷心存之雖切願外倚之有初無煩造朝且重
分闔

賜西平王趙元昊詔

朕奉承端命撫有萬方上席祖宗之謀靡佳兵革之舉專任德教以統華夷推心信人自謂無負卿世懷恭順名冠翰垣嗣享王封守我西土朕不矜官爵之貴不吝祿秩之優任倚中權寵均同姓關市交易行李無猜貢獻頒分道路相屬則朕之恩信卿之款誠稽于大倫誰得爲間今乃遽形表疏輕述僭差且將徇過分之謀舉非常之號冒陳世系輒改歲元省閏再三嗟惋何已寧朕之寡德不足以懷來將卿之失圖自成于迷妄事無萌隙何及于茲況自乃父以來盟書可復今畧陳大要

以曉爾心且卿父誓表其略云臣立誓之後若負恩背義百神怒誅上天震伐使其殃禍仍及子孫此表見存藏之故府卿之先父卒保斯言故能高朗令終功業相襲福之所庇理則宜然今卿忽此背馳了無所據壞爾考之約孤本朝之恩忠孝兩虧今古爲恨揆之王法所不忍聞自卿表之來內外咸憤然朕獨排羣議深惜舊勲恐卿惑左右一時之辭非英傑本懷之欲人誰無過事猶可追倘能去尉佗越帝之名復吳芮漢庭之令洗心嚮善改往懷昔則朕之待卿曠然如舊永終世祿長

爲國藩變通之機不竣終日去就大分其審處之所進
鞍馬駱駝並卻付來人牽回爾其戒已往之愆復將來
之善則永世無窮矣故茲詔示想宜知悉

賜西平王趙元昊爲賜差來人見辭例物詔

卿志凝忠概世纘武勳保障有勞恭亮彌罄比余誕日
首率貢儀差駿產以斯材旅慶琛而有煥仍嘉親校能
恪朝規旣閱右牽之良特渥匪頒之數且昭恩賚并寵
藩維永念傾虔尤增歎尚

賜振武軍節度使知延州范雍充鄜延環慶兩路

沿邊經畧安撫使詔

卿幹棟名材籌帷舊望自付擁旄之任卽臨乘障之衝
叢爾狡羌忘我前施陰連種部規擾塞垣雖購募有科
而威防難廢再念誥努控遏之會安化經營之方節度
素分綏懷莫一斷于朕志合乃使名按瑣序勞繫卿爲
重已申朝命馳錫詔書俾蚊蚋暴集之辰有兔犬指縱
之地宜欽異數益講武韜內安屬國之民外殄反常之
犯稱余遠畧遲乃茂勳

賜奉寧軍節度使就差知涇州夏竦充涇原秦鳳

據秦州奏得卿文字知轄戩等各往宗噶爾城并蘭州住坐兼言道不與元昊往來如元昊入漢界兄弟二人將兵殺截此蓋卿從來一心向國致轄戩等如此忠孝況卿父子至親義須和協與卿同共掩殺僭逆元昊勿落元昊姦便別致間諜誘引

賜中書門下詔

昔苗民弗懷首罹虞竄邇支自立終伏漢誅蓋犯順者無赦于國章除殘者罔限于夷服炳焉通誼疇或敢踰趙元昊戎漠餘妖邊關小種性含虺毒志負狼貪昏頑

表于稚年傲悖成于壯齒曩者德明卽世西控哀淙朝廷錄守方之忠憫稱嗣之禮拔于童豎付以節旄名襲眞王寵視同姓金絮有秩絡繹以周其窮關市弗譏貿遷以通其貨假我明命取重諸羌固宜竭犬馬之勤効涓埃之報克守先業以稱大恩而乃背惠反常毀忠蔑孝僭舉國號扇惑蕃渠跳梁井蛙之涯旅拒秋螳之轍公遣軍校冒服使車列牘自陳欺天罔畏旣彰逆節合舉明刑朕深憐舊勳特加涵覆橫遏羣議密賜手書貸其方命之愆開以自新之路護送來介俾還穹居庶遷

善而革心終恃遠而迷復至敢驅率醜隸攘竊塞民騰
布文符誘誑區落而朝廷列奏邊吏抗辭願舉偏軍往
平狡穴促梟稱亂之首以正不庭之辜朕再念一夫肆
狂餘衆何罪況元昊脅從濟欲濫殺逞威名酋外奔諸
帳懷貳苟戈鋌並縱則玉石奚分且俾列于購科止用
取其魁惡其元昊在身官爵並令削奪仍令宗正寺除
去屬籍惟彼諸部素奉本朝迫此奸兇遂成誑誤倘能
結黨歸義執賊效功必當昭洗前污申明厚賞國有信
誓煥如丹青應賞募科格並委中書門下詳爲條件以

時播告俾體朕懷

夫政平召祥化缺生沴推精盪禳其猶影響故王者遭
異而思德省己以及人交修治綱仰答靈譴朕雖寡昧
敢忘斯舉比者善氣弗效陰管屢臻坤體震于冬藏雷
音發于春孟邊關民舍被害尤苦是用臨朝嗟惕馳使
撫綏推咎以咨讜言協恭而戒臺宰冀獲愆謬庸克振
除尚慮幅員之遐不無官守之衆其間或吏貪而弛或
教虐而苛或狴牢有滋豐之煩或賦徭有輸調之急或
受賕鬻直使下情壅于上聞或隱災逃負使醜恩隔于

周泐或世償逋折巧避赦原或歲嬰呼擾猥妨農作一
物失所太和用虧朕念共斯責者外則有使轂按巡之
司次則有藩條守長之任率荷優寄當體至懷苟前弊
之尚存宜悉心而司革庶迎美應用洽重熙凡厥具僚
無忽余誠

夫至公之行則淑慝咸辨私議弗禁則風俗易偷朕躬
攬權綱茂綏政治每觀邪正之辨思寄誅賞之中庶臻
大猷以止多辟而士類至廣材品或殊久服涵養之仁
寢成黨與之弊至乃挾朋相援奸利自營驅扇颺塵混

淆朱紫託狂辭而市直結陰好以濟仇章交公車聲布
行路使濟濟羣讓有愧堯人之封翕翕煩言更興周雅
之刺永惟澆競良用懲嗟若夫委質事君協恭宣力思
無出位是曰守官和異于同固當擇善況朝經式序仕
次有階因行察言緣名責實苟存忠潔自致顯榮何必
舍爾夷途蹈于險轍鈞名汙行觸禁投愆宜內訟于乃
心毋亟傷于至化尚安所習國有嚴科凡在指神明體
子意

王者稽若大猷總制九服曷嘗不寄治于守宰責效于

監司職焉相維命乃無泛朕奉承景業流觀往辟知仁
壽之本以政教爲先故咨求羣材綱紀衆務察州有等
字邑有員建漕部以謹民財馳使詔以糾邦獄委屬偕
重休戚與均保乂之方數路而已固當上體勞疚允迪
惠和使鰥寡無恫怨訟咸息沐浴至道臻乎太寧今則
不然吏文多端而貪殘日滋民生孔勤而奉養多乏愁
歎未能盡訴囹圄不以時虛感動陰陽延致災眚朕雖
引慝自然申誠博謀眷爾多方之臣得無曠位之責自
時厥後宜惕攸箴班條者企循良之風擁節者勵澄清

之志刑罰則寧寬而無濫徭役則量力而勿苛任百里
不可以自輕效一官不可以懷苟率我王度以承天心
尙或勿虞罔有攸赦布告中外知朕意焉

賜外任臣僚進乾元節銀絹詔

孟序乘離誕辰著令爰率邦儀之舊載均朝享之歡卿
恪奉彝章遠祗慶集聿馳任土來侑稱觴眷旅實之珍
盈驗祝延之悃懇永言歎尙無捨于懷

賜外任臣僚進乾元節功德疏詔

慶序祝延邦儀著令卿發于忠愛申以齋明集方外之

勝緣歸我辰之茂嘏仍因淨範虔疏寶題駢軸相輝通
郵來上具體贊揚之盛益昭輪戴之勤省閱于茲眷稱
無斃

賜振武軍節度使知延州范雍進謝賜牌印月俸

公使錢到任馬詔

卿近擁軍旄往司戎索爰錫印符之重兼資泉廩之
人爵所班邦恩惟舊遽披謝牘仍效名駒敷感載勤靈
誠彌慤永言率禮茲用欽懷

賜奉寧軍節度使知永興軍夏竦進謝賜牌印月

卿乃者繇天臺之聯膺戎閫之重特頒節傳詔刻印章

惟鍾官月廩之豐逮侯邑餐錢之舊並循邦令參寵使
權署政有初需頭來上曲條謝禮併效駿驅永念忠懷
實深嘉歎

卿與賜外任臣僚進端午馬詔

朱夏適中端辰協午肇于嘉節實紀慶儀遽形輸貢之
華遠集效牽之駿勤誠有底累歎無忘

賜諫議大夫張意進謝恩馬詔

賜護國軍節度使兼侍中張耆進謝孫男恩澤馬

詔

近以均錫鴻禧就蕃榮數仍眷抱孫之愛復推延世之恩率是寵章抑推彝制遽陳函奏兼效廐驂感敘過周歎嘉無斁

賜淮康軍節度使同中書門下平章事陳堯佐進

謝差男押賜加恩告敕生日禮物及孫男恩澤馬

詔

曩以茂加勲策追慶門孤並因子舍之歸卽寄使輶之

寵屬推世賞施及孫謀雖命數載蕃而等威斯協需頭

來上駿足效牽過敘感悰有昭邦禮貢輸爲費歎想交

懷

賜龍圖閣學士尚書工部侍郎知并州杜衍進謝

恩馬詔

朕曩者親選舊勞就嘉秘職仍屬綏邊之重且資訓俗

之方眷此序升詎煩過謝駿良來效悃悃具將永念忠

勤靡忘嘉矚

元憲集卷二十七

元憲集卷二十八

宋

宋

庠

撰

內制

賜且勒斯賚男轄戩勅書

勅轄戩省秦鳳路部署司奏據汝將到蕃字譯作漢字稱汝告秦州部署諸官員自家要抵敵草寇便各往宗噶爾城並蘭州住蕃漢兩家往來道不與草寇往來如有草寇兵士入漠界來時自家兄弟二人將兵士殺伊草寇事汝款塞輸誠舉宗效順奉宣王畧式遏邊虞憤

狡寇之陸梁謀成師之犄角忠懷壯節朕甚嘉之然汝兄弟既奉朝廷卽須父子和協盡心孝順和爲一家使出兵之時手足相應同殺僭逆元昊斯爲上計勿聽姦人間牒今賜某物至可領也故茲獎諭想宜知悉秋涼汝比好否遣書指不多及

賜彰信軍三軍將吏僧道百姓等爲授王隨本軍

節度使示諭勅書

朕以王隨時棟名材公槐舊望比付宰司之重頗成歲績之勤而屢控讓情懇辭大任重違謙慙特峻等威俾

改陟于齋壇且兼榮于鉉席眷惟戎節近制寰畿陪余京師式是侯服雖未臨所治而遐率懿綱繫乃軍和之嚴暨于州里之衆邁茲賢帥良愜爾瞻固當善稟教條仰承威惠增崇藩屏稱朕意焉

賜定國軍三軍將吏僧道百姓等爲授王德用本軍節度使示諭勅書

夫擁旄授律以獎戎昭疏藩疇祉以屏王室諒非舊德疇負寵名朕以王德用忠族世勲壯猷亮節早階勇爵幹我近司綢繆萬樞陟恪三接嘉其匪懈之力易以中

權之雄宅是左馮屏厥西夏雖肇頒于新節且留掌于煩機眷乃翰垣底茲威惠所宜率籲衆志欽服化條同底大和以奉賢帥

賜交趾郡王李德政甘州可汗王伊嚕格勒雅蘇

歷日勅書

朕祇仰乾經順修時訓每緣命朔必謹頒常卿詔服世勲協寧邊略屬歲元之更序資玉歷以布和宜克欽承用符恭授

賜五臺山十寺僧正圓凝等新進功德疏勅書

靈山奠方西聖儲瑞聿爲寶所以佑中區眷爾苾芻之流參軒迦藍之重每緣新歷茂集勝因歷讚誦之寶題形熾昌之善祝傾虔有素歎尚無忘

賜元州舒延金進奉謝賜真命官誥及加妻母邑

號勅書

汝祇稟朝威保寧徽瑛霸寵州符之號特頒臺詔之文遽達貢儀罄紆謝臆永言恭順良切嘉稱

賜右屯衛大將軍昌州刺史承裕左屯衛大將軍封州刺史宗顏進和御製讀三朝寶訓詩獎諭勅

書

洪惟列聖參建大猷至訓睿謀充圖溢牒曩緣約史申命記言屬茲講藝之餘將虔布策之覽永懷先烈因予短章仍示宗支用均燕翼汝地連昵屬天賦雅材唱韻甫頒奏篇俄上匪徒挾藻之麗實具然其之能秀劭若斯歡慰何已勉修素業終稱茂親褒善最成吾意偕極

賜知府州折繼宣放罪勅書

汝世荷朝恩任優邊瑣凡該郡政合稟公規覽使者之劾章列部民之訴牘悉條違冒紛有端倪雖涉交仇而

理須置對審如訟狀當正刑科朕以汝忠順之門勤勞固圉方期來效構此煩言良用軫嗟特從矜貸然國章不可屢屈吏議難于再加爾當念咎省躬棄汙履潔心無憚改日以自新上續弓裘之勲勉訓山藪之施保名全節可不慎歟

賜溪洞刺史等進乾元節水銀端午綿紬勅書

慶節稱觴嘉辰角黍汝保寧遐徼欽率彝章任士達誠效珍有品眷茲順恪深用歎嘉

賜乾寧軍兵馬監押右班殿直趙化明勅書

勅趙化明省河北轉運司奏准密院劄子令乾寧軍勘會保明到汝的于正月一日親自部領軍員兵士往軍北蔡家庄鬪敵殺倒賊頭共五人全火當同看詳委是詣實事汝禁庭隸職軍壁董戎能率蒸徒往擒寇孽厥官斯舉編戶用安言念忠勤良深嘉尚故茲獎諭想宜知悉

賜五臺山僧正法震等勅書

勅五臺山僧正法震等省所差副僧正兼真容院供養主英惠大師賜紫廣洎進新正功德疏到闕事具悉

彼名山素嚴真像屬茲獻歲廣集勝因奏疏以聞精誠可諒宜加賜予式獎恭勤今賜廣洎紫僧衣一對絹二十疋故茲獎諭想宜知悉

賜知唐龍鎮殿直來守順勅書

勅來守順省所差人管押進奉乾元節并告家闕及直進馬共四疋事具悉汝率職居邊輸忠奉國爰效右牽之貢仍傾無隱之誠言念恪恭尤增嘉尚特推頒賚用示眷懷其所進馬今依估價迴賜錢七十九貫文所有告家闕別賜銀一百兩並交付差來人至可領也兼賜

差來教練使任璘王受郭海各紫袍衫子一領錢三貫
文故茲示諭想宜知悉

賜祠部郎中知河南府陵臺令兼永安縣趙世長

勅書

勅趙世長近雨水衝注奉先橋汝部押兵士救得本橋
事在昔先皇恭朝陵寢跨茲溫洛肇建輿梁比淫雨之
載零伊衆川之交注汝克勤障捍訖免隳摧言念勤勞
豈忘嘉尚故茲獎諭想宜知悉

賜尚書兵部員外郎知壽州梅詢勅書

勅具官梅詢近草寇竊發汝擘畫捉賊人物安居事壽
陽劇地東楚奧區控引淮淝表裏濤霍逋逃所聚剽竊
寢多疇汝幹材付之郡職果有方略屏茲寇攘枝黨悉
擒巢穴皆覆省司官之奏列知編戶之又安載嘉乃勞
深副予意

賜杭州天竺山傳法住持僧文勝勅書

勅杭州天竺山傳法住持僧文勝汝早悟上機素推重
德近茲京輦肇建禪宮已徇羣情爰命促召將廣安于
法衆式闡真乘宜束戒于輕裝副茲寵待故茲示諭想

宜知悉

賜馬亮進乾元節絹勅書

勅馬亮省所進奉乾元節絹二千疋事具悉卿爰以能材往分外寄載登厥貢克遵任土之規來慶誕辰深諒愛君之節虔恭可尚嘉嘆寧忘故茲詔示想宜知悉

賜知舒州洪鼎勅書

勅洪鼎省所進奉新茶一銀合事具悉汝輟于學館往布郡條懿彼名區育茲嘉舜能採掇而來貢應氣序以惟新言念恭勤良增歎尚故茲示論想宜知悉

唐龍鎮勾招鞍馬空名勅書

汝部族推雄忠勞夙著惟邊疆之頗邇間良馬之素多能選權奇入充貢獻必頒善價用獎純誠

府州勾招鞍馬空名勅書

勅國家務推恩信遠示招懷聞彼邊陲素多良駿儻獻輸之來効固誠禮之可嘉其在賞酬必令優厚勅書到日汝等可多將三歲以上十歲以下堪勝帶衣甲壯嫩好馬赴京進貢候到日支賜茶酒錢及厚給價直已指揮經過州縣館驛支給熟食草料如法供待務在豐盈

故茲示諭想宜知悉

賜知代州趙日新進黃金鍍銀礪石火匣勅書

完石含温良工賜巧熾燃備用卸飾均華會此凄凝之
辰修厥藝常之獻勤恭所至歎尚無忘

賜知廣德軍龔會元進先春茶勅書二首

惟厥苦茶冠于常卉薄言采擷來效貢輸矧屬誕辰且
先方物服恭修職併用稱嗟

江楚之區茗薺攸產陽膏其動露藹載萌擷芳筥以先
期襲采緹而效貢傾勤有恪嘉尚無忘

賜知光州郭昭昇進新茶勅書二首

土毛之繁茗品尤上先春效味輸貢有經眷乃摘山之
勤加茲于橐之密罄恭謹職併用稱嗟

茶品之英淮區攸產當新陽之盈僨先百藹以萌滋著
厥貢條是惟方物遠此甘芳之薦弗違采擷之期言念

恭勤良深歎矚

賜知豐州新授侍禁王餘慶進謝恩馬勅書

昇寵邊勞序遷庭侍遠緣恩擢來效貢輸服阜惟良賜
金有品逮于給使咸俾霑齋深諒爾忠當體余眷

賜冀州刺史趙翰階州刺史張重德進謝恩馬勅書

汝以職勞茂膺恩數眷獎功而甫爾遽列感以勤斯爰效駿牽且將謝意恭虔所底歎愧良深

賜石州安慶府都督康興進乾元節馬勅書

慶節在辰庶邦效貢汝世承邊扞勤稟朝規遠輸牽右之良來集祝延之會永惟忠恪深用稱嗟

賜新授崇儀使李士彬進謝恩并乾元節馬勅書

增秩懋勞抑惟公賞祝延上慶茲乃忠懷繫廐駿之竝

將顧庭儀而有恪恭誠順節歎矚兼深

賜殿前都虞候劉平進謝到任馬勅書

卿輟自衛廬往來邊壘訓齊甫爾感叙勤斯載閱右牽之良彌昭中蘊之恪眷言歎矚無廢于懷

賜潞州安慶府都督安美等進上尊號馬勅書

朕勳迫羣情紹加徽冊繫乃心之忠順樂朝慶之光華遠效名駒來參貢物然載驅多費平估有賞且錫貨緡用酬駿產仍推恩例並獎使勤其在歎嘉弗忘于意

元憲集卷二十八

元憲集卷二十九

內制

賜文武百僚上尊號不允第一批答

宋

宋

庠

撰

夫號惟表功名不浮實休有前誠是謂至公朕以眇眇
之身託元元之上負荷淳烈遙駿大猷持盈載勤燭理
猶昧日慎一日弗遑底寧幸屬中區之和將躬吉士之
報揆乃冬序布之先庚恤祀有初克己彌勵而公袞四
近官師百工經朝逮鄉自夏而裔成一厥慮颺言于廷

願因拜祝之成益余建顯之數省閱于再良用無然矧
曩徇羣心游膺丕稱準文配義已多慙德今又徵祈福
之會崇溢美之聲神聽惟聰禮典將贖齋明抑畏其若
是乎徒嘉乃誠毋重台責

第二批答

朕曩以郊報之嚴邦體攸重親率厥典誕告羣倫方將
勵抑損之誠保齋禱之戒嘉與三事庶尹共遵斯路率
志盡物以優裕于神祇庶無怨恫用迎祝施則朕之精
懇宜諒于朝乃今中外之情愛戴弗已因時熙事增我

號榮連章叫闈至于再請諭而未卻茲愧于懷且禮繁
者易敝于文名高者難副以實矧斯薦信安議重華罔
固溢言往順前指

第三批答

朕奉承先猷日儆端命獲事上帝于茲五郊特以方隅
靖嘉犧齋蠲碩樂與羣執同葳盛儀不謂官師率和奏
贖連委冀緣瑞福之集增列號榮之崇荐諭至懷俾停
過舉而億兆歸美右席均誠叩闈竚命固期開可朕參
慮夙夜審處情文不有所俞曷符愛戴之切不有所避

奚表抑畏之恭若乃寶用善元易冠丕稱是惟勗德匪
曰名功襲用舊章差或無愧至于英睿之烈后辟罕兼
未實而居省已胡益矧歲序之邇變旨屢臻宵舍舛期
坤載愆靜責躬念咎已布于詔書盡誠恤祀方祇于天
戒遽加徽顯是黷齋明宜損溢言之華姑循備物之典
去彼取此欣腆兼常其所上新號內英睿二字宜不允
餘如所請候郊禮畢日受冊

賜荆王賀加上尊號受冊批答

朕屬者徇外朝之請崇徽稱之華甫畢禋燔遂膺榮典

內循溢美兼用建元覲然祇受良增夕惕卿茂親明德
聿隆褒愛雅辭徹奏首罄寅恭表率友藩尊奉王室申
味情旨歡愧兼懷

賜門下侍郎兼兵部尚書同中書門下平章事張

士遜讓恩命不允批答

朕頃虔郊報慎講禮文實倚台司總宣使範肇于齋款
訖乃熙成謀猷所咨陟降咸若褒功胙土恩冠于朝誕
告之辰師僉允協夫何冲避猶爾控陳且名器天下之
公股肱君體之一卿而弗受誰復宜居宜畧常謙往膺

盛典

賜荆王讓恩命不允批答

卿屬冠宗支地尊藩輔禮無與二恩所當先惟是嚴禮
介于繁祉覃爲慶賞實首親賢明制誕敷朝言允協何
圖謙慙再列辭情雖高讓可嘉而至公難廢宜循茂典
卽斷來章

賜知樞密院盛度讓恩命不允批答

曩以蠲吉元辰紹修志祀繫卿舊老相我盛儀禮備福
臻此焉同慶華階茂爵允矣疇庸而乃稽命至公徇高

一己過敷讓懇將廢彛章收汗出綸所繫尤重宜遵往
受卽副虛懷

賜參知政事王駿讓恩命不允批答

朕屬者躬祓嘉壇獲成鉅典歸臨端闕大宥羣生實賴
左右之臣罄宣協贊之力無德不報慶賜遂行參贊寵
章允穆朝論讓封來上謙槩頗勞然信賞勸功之先徇
高符己之細我方懋德人孰顧私當體虛懷無淹往受

賜參知政事李若谷讓恩命不允批答

卿早服忠謀預聞幾政屬余禋類實相齋明勤與禮俱

兆緣誠報受釐之始均賞攸宜遽閱奏函過形讓懇夫
疏封馭貴褒勸大方潔己辭豐踐修末節矧惟成命已
布公朝當廢循牆之私卽虔渙汗之拜

賜寧江軍節度使允讓讓恩命不允批答

卿屬懿地尊器韶韻遠秉旄戎闡司籍帝宗曩展陽郊
之儀參奉上公之獻助余介祉時乃之勤竣事布恩寵
章惟舊猥形擢遜未卽徃俞況定命已行公言普協宜
回冲執時對茂恩

賜保寧軍節度使駙馬都尉王貽永讓恩命不允

批答

卿早服近嫻見推賢帥屬余禋類專倚徼循亦旣均禧
是焉進律質于公賞孰不謂宜而過執冲懷尚留成命
安得徇茲崇讓虧乃懋功盡廢謙私往膺蕃渥

賜殿前副都指揮使寧遠軍節度使鄭守忠讓恩
命不允批答

卿曩執親喪奄踰禫祭雖義從權奪早舉墨縗之文而
官有舊常宜還艾綬之品仍緣褒數進行戶封式示賞
勞詎爲躡等遽茲冲避深體謙勤然命出成綸恩無收

汗卽虔往受母復牢辭

賜宰臣張士遜讓恩命不允批答

卿早服宗工游同宰政式布揚庭之命且光圖舊之恩方佇延登遽形謙避體余慎簡當廢冲懷今差入內侍省內東頭供奉官梁懷志賜卿讓恩命不允批答想宜知悉

賜宰臣章得象讓恩命不允批答

卿曩服僉俞贊圖宥密嘉有勞于幾事俾移變于大鈞方佇延登遽形冲避讓牘再聞寵章猶鬱適圖亮采無

遂終謙

賜知樞密院王德用讓恩命不允批答

卿總司樞務綿涉歲勤特遷內使之華仍易中權之號遽形讓奏稽我寵章宜副同寅卽祇兼授卿久勤樞務兼擁戎麾朝渥旌勞寵章異數疊形讓啓深悉冲誠宜回再僂之恭往對已成之命

賜知樞密院盛度讓恩命不允批答

卿茂宣忠力對掌機衡實嘉籌幄之勤俾換建牙之秩遽形讓奏稽我寵章宜副同寅卽虔初授

賜參知政事程琳讓轉官不允批答

卿夙蘊賢猷參知宰政尚講邦彝之要俾增臺轄之崇
渙令已行讓封來上嘉其謙慤方切倚毗卽服寵階無
廢朝賞

賜參知政王夔讓恩命不允批答

卿德映民宗才經政體蔽于朕志擢佐台猷顧承命之
允諧何奏封而固避雖嘉有讓難廢同寅宜略謙懷用
光賢舉

賜同知樞密院張觀讓恩命不允批答

卿適膺成命參掌繁機朝論允孚謙懷與讓宜虔往授
以協至公

賜淮康軍節度使同中書門下平章事陳堯佐讓
恩命不允批答

卿近解政機榮兼將鉞游彤讓奏彌諒謙懷矧誕告之
徧聞當往諧而卽受無煩遜執式副僉俞

賜新授武寧軍節度使赴本任王德用讓恩命不
允批答

卿久服政樞游彌歲筦盡心匪懈均逸有常特移漢節

之華近奠徐方之重詢于疇若僉曰宜哉疊覽讓封過
辭恩典矧出綸之誕布顧收汗而罔繇宜略終謙時膺
茂渥

賜新授尚書侍郎同中書門下平章事章得象讓
恩命不允批答

省表具知袞職華重槐階峻極必咨民望允釐天工卿
頃幹鴻樞實稔休聞敷燮之任授受惟宜而謙情素懷
累控重啓尋加敦諭尚執遜冲且策名者以奮庸為先
體國者以獨善為細矧茲爰立方切仰成安得遂循牆

之恭稽側席之矧時膺往命勿復煩辭所讓宜不允仍
斷來章

賜參知政事程琳讓轉官不允批答

卿識貫民宗望高時秀比繇卿貳擢贊宰司參決大猷
總領眾職動本直道期于致君年績甫成朝寄滋重式
疇忠概兼肅政機德賞之行公言無間遽披冲述深具
至懷宜略常謙往服休命

賜新授參知政事王夔讓恩命不允批答

參毗國均僉屬邦望卿忠力淵劭思懷疑簡曩考藩最

進貳政樞式時猷爲濟厥文敏績用已試朕甚嘉之移
贊宰庭俾暢賢業而介節難進剡奏自陳遜執雖勞虛
圻方切當廢確然之請庸副往哉之命

賜新授參知政事李若谷讓恩命不允批答

卿局力開濟思謀淹允歷踐衆職簡服近僚以詳文飾
吏師以精器剴京劇侃然奮德華我治朝宰路缺員邦
均疇佐式咨民望參筦政機僉謀旣同亮采惟圻遽披
讓奏頗執冲規儻矜節自高則同體安寄宜囑終謙之
守時副欽鄰之重

賜新授宣徽南院使定國軍節度使知樞密院王
德用讓恩命不允批答

卿茂負忠勞兼資才武曩藉世臣之重入司幾政之煩
寵序節旄籌持帷幄左右無懈歷年于茲奚加使于徽
猷乃改藩于維翰疇功斯允讓爵載勤閱乃奏封尚稽
拜秩固當畧循牆之小善體渙汗之明恩往踐崇階以
穆公議

賜新授宣徽南院使定國軍節度使知樞密院王
德用讓恩命不允批答

卿地服世忠勲在侯表久翊樞務遙制州師曩疇匪懈
 之勤卽寵兼榮之拜尋從誕告孰不謂宜夫何冲懷再
 爾牢讓矧宣猷使範持節戎麾蕃其典章蓋重帷幄朝
 僉德舉咸出至公無執終謙之勞尚違信賞之實卽斷
 重請時對茂恩

賜新授寧武軍節度使知樞密院盛度讓恩命不

允批答

對掌斗樞遙持將鉞隆名重器兼副實難卿望冠本朝
 謀經庶績曩咨雋乂參處弼諧穆然清規式我彝序因

儒林元老之懿換籌幄皇僚之華亦旣歲成是光戎秩
 而游形讓懇固避寵階謙舉雖勞至公難廢卽膺往授
 無復多陳

賜新授同知樞密院陳執中讓恩命不允批答

卿茂器清規冲懷勁節世詒忠教族擅邦華自結先朝
 歷試衆職侃然直道形于造次逮升禁從連撫外藩威
 惠並流聲實借劬眷乃內樞之劇均于隆棟之求斷自
 朕懷召以輶傳諫垣籌幄相資爲重命成之日僉曰宜
 哉何乃奏封猥形讓懇雖嘉遜挹方竚謀謨卽服近司

無淹盛典

賜新授同知樞密院張觀讓恩命不允批答

卿懿行雅材素襟直質曩繇士選來冠賢科椒蘭書殿
之游谷藻辭垣之訓雖復間勤吏事中借守麾政本惠
和道無緇磷逮升禁署復總憲綱已試之能朕所親悉
入司幾事誠協僉謀渙命甫頒讓悰方確矧萬樞叢劇
四近參裨天戒曠工邦思亮采宜略循牆之細用光側
席之求時幹繁機卽斷來表

賜新授同知樞密院王博文讓恩命不允批答

卿儒操吏資邦華士望服于公路多歷歲期出勤宣布
之和入備財煩之使聿疇聲實參估機衡朝無間言我
得才舉奏封來上謙述有條雖難進之風可矜媮俗而
至公之授當廢沖懷往序近司無淹盛典

賜新授彰信軍節度使同中書門下平章事王隨
讓恩命不允批答

卿彙自星樞魁升鉉席奮庸方劭嬰疾有初屢陳遜位
之章姑倚調元之寄而太和未復前請重違爰解鈞衡
寵頒旄鉞仍視台聯之秩俾令邦體之榮疊疏謙懷尚

稽成命矧告庭之已洽非收汗之可圖宜副往諧卽斷
來請

賜新授淮康軍節度使同中書門下平章事陳堯
佐讓恩命不允批答

台槐之尊以穆朝序方嶽之重以陪王室不有舊德疇
可迭居卿比遜煩機是均斯寵誕告于外僉曰往諧游
閱奏封固形謙執雖受爵而讓禮則當然而慎令以出
恩無中廢宜屈辭豐之操協仰懋賞之公促拜徽章仍
斷來請

賜鎮國軍節度使駙馬都尉李勗遵爲疾病乞致
仕不允批答二首

卿勲伐之華材猷兼劭早膺尚禮實睦近嫺以駙馬之
榮列通侯之籍望高貴里時陟將壇而能出擅藩宜之
勤居多位著之恪乃心道素探蹟藝文余懷所嘉曷日
而旣今乃因晦明之偶沴援進退之大方確布書辭願
致官政矧告旬未幾年力甫強謝仕而歸在禮安據卿
其止念慮寶精神招還天和頃遲藥喜慰我虛罅勿復
文陳

卿鼎苦癘疴甫淹時晦特優賜告用適頤生屬療治之
未瘳覽控陳之迭至願還有政追踵昔賢高風所存媮
俗知慕然卿地雖嫻密器實虛恬情棲道映行富天爵
偶嬰無妄之疾固匪不衷之災視履其旋何恙弗已遽
歸印綬殊慙朕心矧嚮福未涯與善無爽勉輔醫藥行
復粹和姑廢冲懷卽斷來表

賜知樞密院王德用等賀壽星見批答

陽序布和瑞躔循軌爰覽日官之奏且符壽策之祥見
象孔昭撫躬增愧卿等協司樞務欣覲乾華平徹露辭

熾昌歸美願因寶貺參紀信書矧在同寅協茲均慰勉
從敷請良切歎嘉

元憲集卷二十九

元憲集卷三十

內制

宋

宋

庠

撰

賜步軍副都指揮使張潛已下啓聖院罷乾元節

道場香合酒果

卿等集被仁祠慶余誕節適當罷會深諒祝延宜渥寵

頒用均熙事

賜宰臣已下上清宮罷散天祺節道場香合

朱律肇和璽符紀節做瓊霄而申禱肅會弁以如儀式

助薰燃宜加頒賚

賜宰臣已下大相國寺罷散乾元節道場香合

慶節在辰外朝祝社祫仁祠而有恤會鄰使以咸臻宜

錫名薰用資華供

賜賀乾元節人使鈔鑼唾盂被褥等

卿等肅奉聘儀甫安候館嘉乃虔恭之節倘多夙夕之

勞宜有寵頒用昭眷待

賜賀乾元節人使內中酒果

卿等已陪壽筭留憩都郵克蹈寅恭允通信睦宜加霑

賚用篤恩勤

撫問郵延路知州部署等

卿等出膺邊寄參總軍和候望雖寧撫循亦至眷惟勤

職良用注懷

撫問環慶路知州部署等

卿等任參邊瑣職總戎昭疆事所經公心攸賴涉茲炎

序諒協常休

撫問涇原路知州部署等

卿等夙官邊部總職軍鈐體余修偃之風謹乃綏和之

畧歆炎在候率履咸宜

撫問真定路知州部署等

卿等夙奉朝恩言綏邊畧軍和謹職疆候沉氛屬此歆
炎諒寧官守

撫問秦鳳路知州部署等

卿等分職邊關布和郡壘協寧疆事無爽朝歆言念祇
勤弗忘存矚

賜宰臣已下上清宮罷散先天節道場香合

令節欽先瑰宮薦會儼朝倫而並集率道範以惟寅特

示頒宣用資薰奉

撫問梓夔路知州鈐轄等

卿等恪稟朝威善分邊職州疆有謐戎律無譁適啓秋
氛諒綏時祉

撫問并代路知州部署等

卿等寅奉朝經協司疆事政條參乂戎索無譁言念恪
居可量遐矚

撫問高陽關路知州部署等

卿等分荷朝恩參寧疆事夙官有次展體惟勤涉此秋

陽勉綏時福

賜宰臣章得象生日禮物

卿亮采光朝生賢紀旦邦儀有舊恩數惟蕃姑篤慶私
所宜祇荷

賜荆王生日禮物

霜籥紀辰門弧集慶眷惟蕃錫抑有彝儀尚讀壽臧且
符欣矚

賜宰臣張士遜生日禮物

卿等業茂承明望崇輔弼爰屬生賢之旦實昭命世之

祥宜渥寵頒用將慶祝

賜宰臣已下上清宮罷散降聖節道場香合

孟冬協序靈節延禧肅朝弁以相趨會珠庭而有恪宜
頒薰炷用獎圭誠

閣門賜宰臣荆王使相節度使加恩告勅

熙事甫成恩章有典已誕宣于著位宜申錫于贊書當
體眷懷往欽衷渥

賜宰臣荆王使相節度使讓恩命不允批答

甫畢嚴禋載均順福乃眷臣鄰之重式推恩數之蕃允

協舊常詎煩冲挹

賜淮康軍節度使同中書門下平章事陳堯佐加

恩告勅

卿台袞蓋臣將旄近屏適均鴻霈載茂徽章仍因子舍
之賢往授贊書之重

賜刑部尚書知徐州李迪加恩告勅

郊類成儀臣工底力眷惟舊德宜進寵章往錫贊書用
光藩闕

撫問真定路知州部署等

卿等分扞邊州參持戎律政條有穆疆場無譁方涉窮
冬諒綏吉履

撫問麟府路知州部署等

卿等肅膺朝選分扞邊虞率職有經治戎無懈適茲凝
冽可諒勤劬

雄州撫問賀正旦人使

卿等肅將歡幣來慶端辰擁行傳以勤斯款邊關而戾
止眷言冒涉深體寅恭

賜賀正旦人使生餼

卿等恭持歡聘來會元正就館方初犒賓有式特申優渥用體眷懷

賜賀正旦人使鈔鑼唾盂被褥等

卿等來聘王春甫休使眷方眷睦鄰之厚宜優適館之華爰畀寵頒所宜祇荷

賜賀正旦人使內中酒果

卿等肅將信幣已展朝容適館載寧加邊有品宜賜禁筵之味更資公讌之餘

賜賀正旦人使春幡勝盤等

端方布和上春啓祚餌辛盤而惟舊戴寶勝以增華併示寵頒且均嘉貺

撫問環慶路知州部署等

卿等奉將朝寄參幹邊符率職有經訓戎無懈方臨韶節勉蹈常休

撫問益州路知州鈐轄等

卿等分輯郡條參司戎籍並勵首公之操副余綏遠之懷益蹈常休以符遐矚

撫問知永興軍夏竦

卿握節寰畿布條關輔忠誠卓亮邊略攸綏適履初炎
具蕃嘉祉

賜賀乾元節人使到闕班荆館御筵

卿等肅奉聘儀來祇慶節駕言輶傳次我都門宜錫宴
私用紓勤勩

賜賀乾元節人使到闕班荆館御筵酒果

卿等將命載虔憇徒有次方卽郵亭之便式燕豐俎之
華宜賚芳馨且資酣懌

賜賀乾元節人使生餼

卿等展幣嘉辰停輶外邸犒勤有式致餼惟豐爰優卽
賜之恩更篤如歸之惠

賜賀乾元節人使鈔鑼唾盂被褥等

卿等奉幣修歡停輶就次惟使勤之甫釋給賓具以宜
優爰錫豐華用昭眷遇

賜賀乾元節人使內中酒果

卿等適展慶儀載寧傳次必厚甘馨之品別將燕衍之
華故此恩頒用昭勤矚

賜宰臣已下上清宮罷散天祺節道場香合

離序孟辰仙符舊節肅靈場而既就昭寶貺以彌新宜
錫真香誕迎茂祉

賜知樞密院王德用已下大相國寺罷散乾元節
道場香合

卿等以朕誕辰歸虔梵果爰屬散香之會載延拂石之
齡宜有頒宣用茲薰奉

賜知樞密院王德用已下罷散乾元節道場錫慶
院齋筵酒果教坊樂

卿等恭祓梵場慶余誕日既畢人天之供宜頒藥餌之

私仍副甘珍併昭慈惠

賜防禦使劉從廣景德寺普門院罷散乾元節道
場香合酒果

卿率職禁聯慶余誕日肅建梵場之果載歸壽歷之祥
宜渥寵頒用資薰祝

雄州撫問賀乾元節人使

卿等奉幣有儀及疆胥會矧韶和之在候諒跋履以偕
勤言念寅恭靡忘嘉矚

賜鎮海軍節度使新授知樞密院夏守贊赴闕沿

略茶藥

卿入掌繁機已膺迅召宜示頒宣之寵體茲眷待之私
賜鎮海軍節度使新授知樞密院夏守贊到闕生

餼

卿適馳戎傳甫戒都門勤禮有初犒儀惟舊往膺蕃錫
深體眷懷

賜鎮海軍節度使新授知樞密院夏守贊讓恩命
不允批答

卿師帥舊臣藩垣茂伐勳酬踐歷入總幾微過列讓誠

難稽公舉

賜鎮海軍節度使新授知樞密院夏守贊讓恩命
不允批答

卿近允徽章俾敷列位再觀封疏尙執遜冲宜時攝于
繁機勿專懷于小讓

賜護國軍節度使兼侍中張耆生日禮物

卿位冠列藩慶周誕日特俾過庭之嗣往宣班物之恩
始體眷懷卽宜祇受

賜武成軍節度使同中書門下平章事駙馬都尉

柴宗慶生日禮物

卿戎節宣風慶弧紀日特命家庭之懿往頒燕篚之華式表恩私所宜欽荷

賜宰臣已下上清宮罷散先天節道場香合

寶誨舊聞先秋令節謹醮場而有式會朝祓以如儀爰錫名薰用蠲慶會

撫問涇原秦鳳兩路沿邊經畧安撫使夏竦郵延環慶兩路沿邊經畧安撫使范雍

卿出總藩條載華使範兼倚中樞之重且紆西畧之虞

宜篤常休用符榮寄

撫問鱗府路知州部署等

卿等恪分事任祇奉朝規永念忠勤克壯邊畧屬季商之在候諒夙夜以為勞用示撫存幸綏吉履體余眷矚罔替終譽

賜宰臣張士遜赴闕都城門外御筵

卿甫膺節召再冠槐階封傳疾驅都門在望宜渥勞旋之禮俾均示惠之私式佇同寅且欽飭賜

賜宰臣張士遜赴闕都城門外御筵酒果

院齋筵酒果

卿等修慶誕辰祈禱梵果散香在會式燕攸均宜錫甘
滋用昭獎眷

賜賀乾元節人使到闕班荆館御筵

卿等恭持聘節用戒都門征馭載勤候亭留憩特伸燕
勞以洽寵私

賜賀乾元節人使到闕班荆館御筵酒果

卿等肅將信幣來慶誕辰迎犒有初燕私甫洽宜加珍
錫參侑歡悰

賜賀乾元節人使鈔鑼唾盂被褥等

卿等肅奉聘儀甫安候館嘉乃虔恭之節尙多夙夕之
勞宜有寵頒用昭眷待

賜賀乾元節人使玉津園射弓例物並御筵

王籟均歡使儀侑好爰設射期之算參陳宴俎之華特
厚匪頒用昭儀眷

賜賀乾元節人使朝辭御筵

卿等將復使軒甫違朝陛率多儀而允恪軫長邁以方
初宜寵燕慈用蕃恩錫

賜賀乾元節人使朝辭御筵酒果

卿等甫訖聘儀將還使路歸裝旣戒候館少留宜錫醇芳用昭眷賚

賜賀乾元節人使回班荆館御筵酒果

卿等聘禮甫成歸塗云戒式厚都亭之餞將勤征軼之行特賜甘馨用滋酣悅

賜賀乾元節人使回至天雄軍御筵

卿等復命使輶次塗州館冒初炎之燠若想夙駕以勤斯宜錫宴羞用申犒禮

賜宰臣已下南郊禮畢御筵

郊配成儀臣工洽祉當速燕私之惠且紓陪贊之勞宜抃慶辰往均良集

賜賀正旦人使赴闕至天雄軍御筵

卿等肅將鄰聘甫次近藩諒行李之爲勤矧凝嚴之在候宜申犒禮式表恩華

賜賀正旦人使到闕班荆館御筵

卿等遠將歲聘近戒都圻惟涉路以載勤俾頒觴而申犒並宜歡飫昭體眷恩

賜賀乾元節人使玉津園射弓例物并御筵

卿等適達鄰歡甫均燕惠爰擇園遊之勝且觀決拾之容仍渥寵頒以昭眷佇

賜賀乾元節人使回至天雄軍御筵

卿等奉成歲聘回飭使驂冒朱籥之初炎次星街之近鎮特頒宴犒用篤恩勤

元憲集卷三十

元憲集卷三十一

劄子

賢良等科廷試設次劄子

宋

宋

庠

撰

竊見近者召試制策并武舉人于崇政殿皇帝陛下親蹕留神永晝嚴門異席程其才畧誠見聖心覈真偽進英豪之審也然臣以謂有司祇事失于奏請苟從便易乖戾舊章措置之間甚不稱陛下求賢之意伏覩賢良方正蘇紳等就試之日並與武舉人雜坐廡下洎擯辭

寫卷皆俯伏氈上自晨至晡訖無飲食飢虛勞瘁形于
嘆嗟雖僅能成文可謂薄其禮矣又況武舉人等才術
膚淺流品混淆挽弩試射與兵卒無異使天子制策之
士並日較能此又國體之深譏者也臣竊爲朝廷惜之
臣不敢上引漢唐以煩省覽仰惟先帝故事布在耳目
縉紳列位孰不知之謹按真宗皇帝凡五策賢良皆躬
御便坐其舉人就試並于殿廊張幕爲次垂簾設几大
官賜膳酒醪茶菽無不畢供聖人之心以爲張不次之
科待非常之士所咨者天人之際所質者古今之宜言

若可行高者足以和陰陽躋仁壽下者足以明利害觀
學術是則所責于人者若是之重矣所設之禮又可以
輕乎勢自當然非苟而已臣恐有司自今以往待士之
禮因循亡棄則國家設此舉必無異人何者夫士有高
才必有高節節高禮薄將恥而不就其就者皆輕躁傲
倖先身後義之徒適足啓偷競之風玷詳延之詔若執
事者以爲人不逮古文不中程虛屈至尊行不急之務
則因而能之可也或惜其歷代盛土之所重當世奇才
之不乏則先朝舊禮庸可廢乎伏願申詔近臣檢詳舊

元憲集 卷三
史作爲定式付于攸司今後每試此科卽備陳條件凡厥供擬關報所由仍乞或有武舉雜科不令同日就試庶擬人于類有協禮經仍貫而行嗣恢世烈狂言聖擇或補大猷如允所陳乞降付中書詳議干黷旒扈臣無任省循狂瞽慙懼屏營之至

封畿劄子

謹按周制王者都畿千里千里之地謂之寰內井田百萬是之自出兵強地廣以制諸侯漢都關中亦分京兆馮翊扶風爲三輔又取河南河內河東弘農四郡合三

輔之劇遣司隸校尉以督之雖地非幅員侈于周制若其包山河之固冠郡國之首置使持節不與部刺史爲等亦王畿之意也魏晉而下始以司隸之治爲司州南北分爭名實始替然江左建國常以宰相帶揚州刺史朝廷根本此焉是賴至唐有天下復都長安乃因關河形便分州郡爲十道而關內一道全是王畿雖無司隸之名猶以華同岐三州爲上輔河南爲東都而京畿都畿並置觀察使此皆強幹據極統御庶邦國家因循五代卽都于汴地非京邑之舊州無輔畿之實自祖宗以

聖武神略剗平僭偽萬方臣妾會于京師雖城闕雄尊
閭里繁衍而諸縣之外便屬他州州雖密邇卽爲別路
畿內十六縣纔置提點官二員人瑣位卑降于漕軍之
局寧所謂尊甸服重王官者哉臣欲望略依周漢舊章
以三京所環之州畫爲畿內曹濮滕單陳蔡鄭滑等八
州輔開封爲中畿以孟汝二州輔河南爲西畿以宿亳
二州輔應天爲東畿併三畿之州升曰近輔通置畿內
觀察使一人以統之取臺省給舍爲出入之資凡輔州
並乞正除刺史取待制官以下正郎以上爲出入之資

俸秩班品異于列郡除去今日虛名之弊且示聖朝正
官之漸然後舉畿內之籍均其租稅輕其徭役踵漢故
事徙天下豪族內實三畿之州四面設關梁譏出入以
嚴王制應禁兵營府分據寰內如此則海內震服而王
室安矣

乞御前殿朔日立仗羣臣朝服劄子

臣聞告朔之義周家尤重在昔宣聖愛羊存禮漢沿周
制合朔朝會故惟優借大臣許朝朔望唐制立仗羣臣
皆禮服入會藝祖受命論次開寶通禮亦著月朔入閣

之儀則朔日者爲政之端辰講禮之盛節國家因五代之亂承千年之統始勝殘去殺務從簡易雖制度既定而謙讓未遑五日一參靡分朔望禁衛單少威儀粗率禮典弗振則朝廷不尊國容寢廢則臣下不肅臣愚以爲羽衛之設非矜華侈所以重主威也朝會之作非專拜揖所以飾治體也臣願陛下上攷成周仲尼之法下稽炎漢皇唐之盛近守太祖開寶之禮明詔執事祗按成規每遇朔日坐前殿朝羣臣旗旂細仗以次陳設公卿朝服如儀而罷如此則臣道肅而主道尊于以示四

夷風萬國警民耳目不可闕也夫禮有以素爲貴謂其誠慤有以文爲貴謂其采章伏望陛下錄臣此言使博士禮官得確論可否講求故實如曰便禮卽奉而行之使重熙顯猷執競丕業由陛下之馴致也

乞于御苑空地內種植奉祠祭劄子

伏見國家每歲大小祠祭黍稷取于太常果蔬出于司農茅茹責于光祿然三寺皆牒取市物入供祠饌但具名品無復馨嘉雖明德上通不貴多物而工祝奉告固有愧辭夫孝子事親必求仁粟聖王饗帝實立神倉三

代以來茲禮惟重取不告乏用乃有虔國朝因循未遑
斯議故令官司怠沓祭典廢墜百靈薦嘗一切須索習
慣成瀆神無據焉臣竊見玉津瑞聖諸園舊有隙地異
時主者懇爲公田歲藉其收以備常用臣願卽于苑中
擇上腴之地播五穀之種謹耘耔之法慎登穫之勤每
春種秋斂之陛下順時乘輿親省彷彿畎畝因行勞賜
一以奉國大事一以勸民力農穀成之後擇其上者奉
大祠次者奉中小祠各以御廩付所由吏鬯劑粢品悉
量而取之至于果蔬之細皆須苑圃之植外盡庶物內

將至誠達其令芳以介福祿茲亦三代爲籍千畝以事
天地社稷山川先古以爲醴酪粢盛之比也其與物物
仰市煩褻神祇者寧並日而言哉

乞差當直兵士劄子

伏觀唐制凡在京文武職官自一品至九品皆給防閣
庶僕州縣官僚皆有白直執衣今來外任自知州以下
至簿尉並給兵士散從官承符手力之類品位至卑猶
給七人名雖不同其于供身指使猶用律文白直執衣
之法國朝稽若古道備衆官惟在京臣僚僕從無準竊

見翰林學士及尚書丞郎兩省給舍并待制以上皆天子從官並有呵引條制其從人則學士每員差開封府散從官各三人待制以上二人別差諸軍剩員各三人每員共得六人至五人其剩員又多是年老疾病加以本營迂遠每分番上下尚只得一人指使非獨不任驅走亦且虧替官儀非所謂尊朝廷重臺閣也欲望聖慈下有司將往代制度律令比類今來官品量添人數又在京冗兵至衆乞除元差散從官外只于諸軍雜役兵士內每員各給十人以充當直其剩員卻乞放還本營

若上件官內有差任三司羣牧使御史中丞知開封府管勾三宮觀三班院提舉在京諸司庫務自有合給公人兵士者更不兩給庶其祇奉朝請出入公門辨堂陛之有差免儀服之失體定爲新制庶協舊章

乞毀棄元昊僭僞文移劄子

臣近者兩蒙中書奏傳聖旨令與學士丁度等同撰賜僭逆元昊答詔及後來削奪詔書聞各付外行下臣竊惟元昊塞外小醜世載兇狡背恩忘義屏棄人神鴟張以來雖懦夫女子皆欲折箠奮挺縛致都下數罪梟首

以戒四夷况服官在公之臣何堪容忍陛下天資仁恕不嬰細忿且以蚤虱瘙痒非四肢之患哉兵謹備未令誅討但設購賞俾殲渠魁蓋不欲疲人命也自德音之發士無愚智莫不感恩怵德知聖人之度然臣伏思所降詔書賞格已遍諸路元昊自知罪重固無革面懷音之志必將妄作符令吠堯詬天傳入邊疆污染民聽又或詐爲章表緘置醜言規避朝廷冀傷威重竊恐守塞將吏不知忌諱或得敵書爭先啓聞自謂有探伺之能實非人臣所當言也欲乞預勅邊吏若得元昊章表許

先開視凡僭僞文字應有辭涉悖慢者並須隨處焚毀勿使騰布除其間有入寇時月及邀約部落之言須合聞上者止令抄錄大意即時馳奏庶內外不瀆以尊國防臣忝備近班理當申罄涓埃之益敢冀裁擇

論蠲除雜稅劄子

臣草茅之姿光華邁運近承人乏入倅計司惟厥吏員實掌民版以一介駑緩之質閱四海征賦之益徒爾首公無所紓責輒懷管穴思報毫分罔避嚴誅仰干睿聽臣聞立簡易之法則民不惑去因緣之姦則吏無害省

元憲集 卷三 八
簿領則要可舉一賦稅則取有名此皆治道之所繇而
歷世之無改也臣竊見當今正稅之外雜賦至繁詭制
異科醜名暴斂原其所自由來甚邇蓋自唐室解紐五
朝挺災孱王僭侯盜據方國壞合徹之典取一切之宜
陪尅無厭禁令自出于是有身丁地頭之賦農具牛皮
之征鬻酒則戶出麴錢煮海則家增鹽價雖與民更始
而弊制尚存官司因循憚于改作故使堯舜之代無桀
貉之中雖臣之愚竊以爲過今縱不能蕩滌橫賦以寬
民財猶當釐易舊名少近王道臣愚以謂可取雜名稅

錢及派納之色不移舊數合爲一號削去季世剝害之
品作爲我朝較畫之法示之于民則耳目易曉委之于
吏則條貫難欺錄于官曹則文籍不煩供乎財用則稱
謂差美此舊入無秋毫之損新規有指掌之易丕變訛
謬垂于經常實天下之幸如允臣所見乞下三司令子
細勘會見今天下諸雜稅錢外沿錢名目貫百聞奏然
後取其實數併爲一號逐年折變自從舊法斯皆防忠
制法遭時垂統者也臣伏見國朝以來詔數下而建條
比牒連名充曹初府煩科碎目與日而滋每罰一罪斷

一事有司引用皆連篇累牘不能徧舉率不數歲則別加論次謂之編勅蓋欲條貫飭盡綱目畢張大可含元細不容髮而抵冒未絕風流寢濫一令之下則姦生令表一禁之設則罪出禁先示于人則若教猱施于事則如絜網此皆不循其本而求之于末將欲措刑辟躋仁壽者不亦難乎夫恢恢有條重而必罰者本也事事曲制輕而易犯者末也本不舉則巨猾徼倖末專任則細民罹災今之詔條病在于此陛下幸加大惠惜皇猷之未暢深詔執事精覈舊文欲因盛時遂定丕律臣以謂

不一勞者不永逸無遠慮者必近憂今雖定之後必復改何則制度不立賢愚雜議故也爲之計者莫若盡取見行詔勅與律文相校律有本條而勅意小異者則改而入律律無本條而名項別立者則編而爲勅況唐律之內廢條已多若擿去舊文益作新例亦前王損益之常也人情不能無過王道禁乎太察其約束之煩語官司之小禁宜一切蕩除蓋去之不足害治體存之徒以飾罪梯法輕不能繩姦豪文密足以汙良善臣又聞王者之制揭若日月動如雷霆其言易而文其禁切而廣

伏見今之編勅者繁長猥俗與府縣文移無異用字乖舛遣辭重複寧所謂明白溫醇之旨耶實由不專任達識大儒而多用執法之吏夫法吏者奉行其法可也寧制法之人哉古人有言治國如治家耕當問奴織當問婢今欲與法吏謀致治之本是猶使奴織而婢耕要其成功不可得也臣欲乞專委鴻博之老及輔弼大臣商較勅條略依律又爲體裁其辭句第其輕重約其義明其文布之四海使識朝廷之尊傳之萬世俾知文雅之盛自今以往有臣庶上言欲釐改舊法建設條禁者願

陛下慎其俞旨必先付之兩府參之羣吏若前條確見其短今文率以爲便可行于經久者卽下兩制令以所陳之狀去其蕪雜取其精意倣古律令著爲章程若其事止苛文不足發明利害者皆寢而勿報如此則法不數變而民知所措矣多言者必難臣曰今若依律令以爲勅天下官吏必不能曉臣對曰今天下所頒律令曹局小吏猶能引用則似律之勅獨不能曉耶此膠柱之論也又必難臣曰夫詔勅者多先帝所定而不當改作臣對曰凡詔勅之設本臣庶上陳之見耳寧一出先帝

之口哉況聖人以便利萬物爲至仁不因循陳迹爲至孝且太宗皇帝改建隆之勅真宗皇帝革興國之法是皆可乎此守株之談也臣又聞事不師古商典寔譏必也正名魯堂攸訓雖文質異尚沿襲有宜至于辨尊卑分職業其實一也竊見國朝故事自使相及左右僕射以上出典州郡者皆曰判六尚書節度使以下者皆曰知蓋以謂僕射而上品秩隆重藩鎮之任地望卑遠故以尊臨卑者判其事以小任大者知其職及除佐官則例曰同判之職自京官以上皆可任焉今六尚書知州

于上京官判州于下名旣不順理亦無稽而又朝廷之儀臺省爲重近緣苟且寢失典刑尚書都省尚書令之職也今兩省五品以上皆得權判刑部流內銓皆尚書侍郎之職今或以知雜御史判銓事或以升朝官判刑曹其餘卿監之司小官判者多矣天下友邦大郡大臣不得判天臺帝省小臣得判之是重諸侯之藩而輕天子之吏臣竊以爲過矣又府史者二人之名也故自周禮至唐令有其任者皆曰府若干人史若干人今寺監見有其人則併稱府史此雖小吏而名不師古亦朝廷

等謀猷疎暗奉職不稱之咎也陛下幸開大惠不忍加誅丁寧垂喻俾悉其意此誠謀及卿士詢于芻蕘之成訓然臣等旅服三事義殊百辟以謂中書門下政令之所出也朝夕之所詢也事無巨細謀無遠邇皆可罄率庸淺日陳于前隨宜置務靡容有隱不當更竚清問始復條列至于守禦方略之要則與樞密院並可議定餽運便宜之常卽下三司轉運司坐見虛實凡所關啓略可施行此陛下之明悉也雖使各述爾志亦不出于茲矣惟詔旨內深入討擊一事臣等自來未敢輕議非謂

沮損威重直以勢有輕重時須進退請試言之夫中國之人習見承平久矣將不六十不更金鼓戰陣之事卒不五十不經疆場馳鬪之役齊民編戶租稅之外不知差調率斂之勞猝然有警孰不騷動自劉平石元孫陷沒之後邊防震擾吏氣沮傷奏報相銜妄增敵數或言四十萬或稱三十萬故敵未攻壘先杜城門寇已出界尙求兵援將帥庸懦亦緣人情未嘗諳歷故也今若更責未習之將驅嘗敗之兵討已黠之敵而希百勝之術無功必矣故臣等近者但乞本路修峻城堞以遏奔衝

籍閱強壯以擬緩急速遣韓琦等馳至邊郡采訪利病
補救頽敝且爲今秋守禦之策仍令紆放倚閣緩責轉
輸綏撫西人務令安堵且亦申戒邊將以時訓練使寇
去弗追此上數事雖皆老生常談然當今守邊之策未
有易此者也臣等又料狡寇情狀必須再謀寇抄欲乞
諭緣邊守戍因寇入境之際或羸師以誘之或伏險以
邀之或奇兵夜斫其營或堅壁晝挫其銳務據便地勿
與馳逐俟其疲老則掎角以斃之如此一經創艾則可
以漸謀羈服矣臣等熟計莫便于此至若臨機處置應

變弛張一二之言非可豫述事至中覆未爲後時然敢
不策發愬冥以須期會思有伐謀決勝少報萬分然後
退就田里誠無所恨臣謹昧死上愚對惟陛下幸察

資政殿答手詔

臣等十六日蒙恩召見資政殿面賜手詔一通且以財
用不給之端仕進多門之弊收守將帥之未稱西北隣
敵之難防躬形德音徧詢列位臣等以忝任丞宰首膺
延訪伏讀聖訓愧汗交流何則執政之官與國同體陟
降四近政靡不聞參決萬機言無所隱雖或論議之深

淺裁處之否臧未格大猷仰煩宸算至于罄盡庸識條
列事經均憂共責固以日陳于左右矣今方特被天旨
更咨急務此乃臣等奉職不稱之明效而陛下至慈臧
疾之大恩弗忍棄捐尚令自效夙夜慙震弗遑寧處然
申命確切靡容控讓敢不畧述綱要以裨萬一謹具條
列于左方

一聖詔曰間者西陲禦備天下繹騷趣募冗兵急調軍
食雖常賦有增而用之不急累歲于茲公私匱乏者臣
等謂西事之役首尾十年毒始邊陲事叢關陝募兵加

賦救急一時蓋中國太平之民遭強敵倉卒之變勇者
未及練而督之戰智者未及慮而使之謀故聚軍則惟
恐不多而忘養之之費斂財則惟恐不盡而忽繼之之
難又嘗黥農以隸邊鑄鐵而爲幣事多棄本策罕要終
逮此平時方見其害此公私所以匱乏矣今幸凶醜自
斃封畧少安四路雖有帥臣重兵漸移內郡緩徭節費
多所改張陛下復采衆謀思加大惠以陝西小歉及錢
法鹽禁之弊特遣仲簡馳往撫存付此二條就詢利病
方總內外之論別謹財賦之規俟見所長敢不悉心商

摧其冗兵料檢聞樞密院日亦講求必有遠圖以弭來患

一聖詔曰承平寢久仕進多門人浮政濫員多闕少滋長奔競糜費廩祿者臣聞欲影之正者必端其表欲流之潔者必澄其源此雖老生之常談然實治道之要術朝廷設官取士固有成規三年一開舉場九品盡由銓選其餘資蔭入仕流外出身或托附權臣謂之門客或因緣酬獎不累年勞攀例承恩詭名希寵人浮政濫抑有由來臣等謂取士者政之表也補吏者官之源也近

歲舉人殿試有老榜之目但論舉數無取藝能釋褐雖被朝參恩選已登暮齒縱分職任盡昧廉隅臣等欲乞將來科場罷茲一事又每歲百司人吏出官甚衆羣臣子弟增年就祿員多闕少不得不然今審官院流內銓例許成資便令除替雖守闕者暫時爲利罷任者赴選益多苟且因緣不能盡舉以上三事欲乞各付所司審加詳議委中書門下裁酌以聞如此施行似堪經久一聖詔曰牧守之職以惠綏吾民而罕聞奏最將帥之任以威服四夷而艱于稱職豈制度未立不能變通于

時豈簡擢靡臻不能勸勵于下耶臣等竊觀舊史欲治之主未嘗不留意守令以寧方內慎求將帥以清戎索矧陛下秉至聖之德御久安之世靖民防患孰先于此謹按朝廷列郡四百地踰前代參建官吏分督政條其間知州實匪輕選大者則領以公相次者則寄以從官其餘遠邇由卿郎官而下莫不惟材是擇考績序遷一有踰違並從按劾或降或罷無所私焉臣等謂選任之官如此粗足若欲人皆召杜政必龔黃質干前聞恐難盡然重內輕外今古常情臣等敢不更務采掄審加勸

沮或申明約束或廉察風謠奏最之科庶幾可復然不得謂制度不立矣若乃將帥之舉宥密是司國朝之規名分難越儻或奇材拔于羣萃勇畧著于邊疆任用之間亦當公論然不得謂簡擢不臻矣

一聖詔曰西北多故敵情難常獻奇譎空言者多陳悠久實效者少備豫不虞理當先事者臣竊以契丹結好四十餘年厚幣至恩淪于骨髓邊民白首不識干戈此先帝所以遺于無窮陛下所以守而不失間者曩霄違負恩義驚擾塞垣虐用種人旁結鄰敵自知禍敗還復

首降陛下愛惜生民盡赦前罪賜以府庫之餘幣結以丹青之大信懷音歸德邊畧乃安雖王誅未加而天罰遄及梟凶狼噬父子相殘此二敵者皆被國至仁宜不敢自違信順設有狂悖終是外虞但可嚴戒邊臣常修戎備守金湯之固積糧廩之豐持重如太山不測如滄海常使直在我而曲在彼此聖人羈縻之術也近聞議者多欲乘逆羌斃陪之會遺孽孤弱之時分割土疆誘來部落此乃奇譎空言之類非悠久實效之言深願聖慈抑而勿聽伺幾取斷謀之未晚臣等仰被清問殊乏

遠謀粗畧條陳不敢文飾陛下畱神幸甚

崇政殿與樞密院同答手詔

臣等今月十七日伏蒙聖慈召赴崇政殿面賜手詔各一封仍令中書樞密院一處商量對答聞奏者伏讀聖訓震駭愚衷退而詳研稍分條目乃知皇帝陛下防危于慮表求策于事先鬱悼諄勤徧咨良策此誠聖人勞謙思治博索廣詢不以睿哲掩尋常之謀不以高深辭淺近之益雖舜好問禹拜言無以過此奚獨臣等幸甚抑亦天下幸甚然臣等預聞幾事皆忝近司自去歲春

陛下有祕殿疇咨之勞迎陽敷納之廣是時中書樞密院亦各條對急政尋曾面論以謂兩府者佐天子決大政總四海謀議評百官能否或片言可以防患或寸效可以佐時凡有見聞便當裁處不須承命然後告猷而宸旨丁寧辭不獲免覲顏待罪粗述大綱雖荷天地包荒之仁終慙股肱同體之美今者再煩清問是重前尤旣不敢固拒詔音仍且許協陳公論銜恩被貸無可寘言敢不悉心同上愚對謹按聖詔大畧以今契丹因我西征之役遣使來告深慮狡黠別有邀求詭譎多途作

何回答臣等竊謂契丹之性雖不可以禮法爲期待文辭爲約束見利則動緣間則爭固其常態至于向背之勞逸利害之重輕雖曰匪人亦將有擇契丹自景德通好垂五十年冠蓋相望于歲時金繒沓委于幽朔戎馬不汗而坐收厚利邊烽不焰而自稱鄰國彼若常保此誓可謂逸而不勞常獲所資可謂利而無害今或自違信順妄作端倪心欲渝盟以圖入寇是則部落蒙調發之苦蕃兵須賞餌之科穿塞必有矢石勝負之憂掠野不過牛羊廩窖之獲我若堅壁以持重蓄力以待疲去

未有借賢于既往待俊于將來必以一世之人治一世之事不可謂將無韓白而廢軍帥吏非龔黃而去守宰顧其策勵獎育任使之術何如耳苟得其道胡恤乏才若能賞不過功罰必當罪上無姑息之施下無僥倖之求則雖懦夫可使握節以制軍女子可使攘袂而赴敵又況擇材武之長用訓練之師哉大法一行則賢者不得藏其謀何煩于自薦智者有以申其用何待于衆推而綏寧鎮禦之方惟所使矣聖意又念河朔軫救之外軍儲闕乏及向去財用如何省節加以冗兵尚衆戰馬

未萃發于焦勞並令周悉臣等伏以冀部不幸決溢爲災中路州軍例遭湮沒此則非緣他故專爲河防民戶旣以流亡田畝未能耕藝且可恣其所往以就廣饒所在撫綏庶幾存活議者多欲使州縣出粟以救其命虛倉舖餒誠是深仁連營乏儲更非小事欲乞嚴勅三司及安撫轉運等使凡係本路浮費且令一切罷之專以調食爲先次以安民爲急若向去秋夏西路豐登必有餘波可蘇疲衆至如冗兵一事最是減費大端近日雖累降指揮並令揀退天下剩員萬數亦已別行催督其

元憲集 卷三 十一
餘條貫敢不申明此則較向所用省節之矣若乃戰馬
登耗事有監牧然自昔生馬之地今皆不屬中州惟藉
四夷與官互市切聞邊關未嘗肯出名駒徒費財珍例
多驚劣其源若此爲弊實深自餘坊監官司華戎貿易
更乞下羣牧制置使多爲條約以量價直重明賞罰以
督蕃孳常或舉修亦恐可登舊數然臣等今來所陳以
上數事卽是日夕奉行行而復言理不踰此竊恐衆臣
議論別有所長欲望聖慈盡取將相學士以下對詔之
文降付中書樞密院商量行遣匪徒逃尸素之責固亦

合中外之謀天下至公于此爲美惟陛下留神裁幸

答手詔

伏奉手詔以元昊未平邊防用武上煩聖慮諮及具臣
竊以元昊旅拒偷生巢穴深固若或興師出境必須命
將得人又緣承平以來久無征伐縱有驍勇之士皆非
繇歷之流況復饋運之間勞費斯甚陝西民力配率已
繁更或隨軍愈難應副且當靜守頗謂得宜今來邊臣
例循舊轍靡營禦寇之策但急濟師之言須立定規俾
從經久緣邊州郡皆有熟戶蕃兵不能訓齊但務姑息

雖有弓箭手人數甚衆其如部伍未明至于本城蕃落定功之類亦未嚴整凡所防托悉藉正軍是致調發之煩不無科率之困復有多立小寨例蓄糧儲無事則兵勢虛分臨敵則不能自固奔衝掩襲職此之由所宜委自轉運使與逐州長吏量其戶口籍定土兵每至農閒輪番教閱仍選勇敢有部轄之人充等第將校其熟戶蕃兵亦須點集齊整檢括人數與本城及弓箭手每臨陣敵前後節次使用所有敵兵出入道路合行把截去處並可展置大寨令弓箭手與本城兵士守把其諸小

寨不可廢去者量留側近土兵看守探候不得廣積糧草所有朝廷差去禁軍只委自部署鈐轄路分臣僚相度敵勢遠近策應如此則固守有常東兵可減蓋資其土人服習道路彼中每有點集易爲探候自免奔衝而又兵籍素定經費有涯轉餉之勞漸可撙節自來每招役蕃戶耗蠹頗多主帥但納其虛言臨陣恐成于悞事今後不須枉用金帛更有招收其逐州長吏能訓練兵師修完戰備膽勇材幹爲人所稱朝廷當與保全不責小過歲滿成績增秩再畱使之恩信及人用明獎激臣

等素不知兵叨居近列欽承睿問莫副天心無任戰懼之至

元憲集卷三十二

元憲集卷三十三

行狀

宋

宋 庠

撰

宋故推誠翊戴功臣彰武軍節度延州管內觀察

處置等使金紫光祿大夫檢校太傅使持節都督

延州諸軍事延州刺史兼御史大夫上柱國武威

郡開國公食邑六千五百戶食實封一千六百戶

贈侍中曹公行狀

曾祖業累贈太師尚書令兼中書令追封榮國公

祖芸累贈開府儀同三司太師尚書令諡武惠追封越國公

父彬故樞密使累贈開府儀同三司太師尚書令諡武惠追封魯王

真定府靈壽縣某鄉某里曹瑋字寶臣年五十八公之先本出晉清河太守泓之後泓卒子孫貫其郡後徙真定之靈壽今又爲其邑人高曾值唐室之騷皆以才力事州爲列校忠規雄算屈于地勢故二祖閭閻不章于王朝逮魯武惠王之興功蓋盟府擁旄服袞綢繆

累聖率義而上追賁烜赫王又重之以勞謙明德保躬不伐歿從太烝爲宋宗臣使今天下言諸侯王世家者以曹爲首公卽王之第四子性英壯沈決形于羈卯武惠節制鄆徐也竝奏署公爲天平武寧二軍牙內都虞候以恩換西頭供奉官閣門祇候叛羌李繼遷擾靈夏太宗畱意邊瑣將屯之臣時武惠冠領內樞面奉詔舉材堪西事者久之啓上曰知人不易朝廷雖多士臣未見其能臣有子某好謀而斷謂堪試用太宗喜王之內舉卽日召見欲命公以諸使王固辭召以本職同知渭

州時年十九迎者驚其壯真宗嗣極就改內殿崇班咸平二年正領州事俄丁先王憂以守邊不得歸及葬自請還喪廬畢劬勞之報書數上辭情哀切朝廷念繼遷旅距又公治最已顯詔不聽卽拜閣門通事舍人頃之加本州屯田制置使轉西上閣門副使徙知鎮戎軍繼遷虐用諸帳人不堪命朝恩購募安輯所以慰納之良厚吏多不能奉揚威德公至部則騰檄區落告以丹青之信戎人得詔書皆泣下由是喀努羌舉族內附繼遷兵討西涼諸姓還次石門川公率軍邀敗之多所俘馘

威震夷鄙自爾黠寇往來不敢近當路塞軍境平易無扼束利于馳突又邊民挾弓矢應募爲官軍每有警則輒爲前鋒而官無資糧器械之費公因奏言請竝隴山而東循古長城剗大壕以隔敵騎給境內閒川復賦役夏秋出戍卒護民耕穫以賞義兵制皆曰可迄今奉行爲故事時繼遷死餘燼衰破子德明畏誅奉獻計不堅定公請出師討之上以德明首鼠兩端且諭公以待其變俄而揚珠瑪哈等族萬餘落款關順化竝乞師應接將吏疑怖欲弗許公獨決策夜將兵逼天都山信宿盡

擁其衆歸因是諸小種皆納質保塞值德明亦輸貢受
爵土而公名寢重矣驛書召還錄前後功正其使名充
邠寧環慶路駐泊兵馬都鈐轄俄又命兼知邠州封禪
恩進使東閣帝以公著效西土更欲以名震北道大中
祥符三年卽使號領高州刺史徙爲真定府定州路兵
馬都鈐轄又出公所上涇原環慶兩路邊州圖以示輔
臣曰山川華戎城郭儲峙之要盡在是矣可別繪爲二
一畱樞密院一付本路使按圖以從事因嘉歎久之歲
中復徙涇原路兵馬都鈐轄兼知渭州西祀恩遷四方

館使札瑪克部大入數爲寇害四年夏公勒兵與大將
支軍出武延鹹泊川合擊破之捕斬首虜數百奪甲鎧
駝馬牛羊居多上書讓州事願專督兵要密詔不許五
原外界有巴勒臧族屢違王命公因按塞夜襲之殲其
衆厥後屬國羌無敢叛者乃請補百帳以上酋長號本
族軍主次曰指揮使以擬王臣部曲之官七年冬西南
諸戎解仇伺便欲穿塞爲盜特遷公引進使再留州任
以防遏之先是隴外有棄地號籠竿川恒爲兵衝州無
外蔽公按形勝築城以鎮之自是寇無踰心而我有重

關矣明年春復與大將陳興等討扎瑪克餘黨滅之未幾改領英州刺史充本州團練使秦州宗噶爾人李遵挾且勒斯資爲之謀主裁制種落號爲文法衆十餘萬雄長塞外遵因獻方物求贊普之號用詔拜爲保順軍節度使以羈縻之然凶狡恣睢專趨邊隙乃使其舅賞雲丹說義從羌郭蘓達勒謀爲鄉導公知之許蘇達勒以重賞使圖雲丹後十餘日斬其首旣而前預謀者皆逃怖伏匿公誘召之許輸物贖罪是歲入塞者數千人因其效率量賜繒綵或以少爲訴者公怒曰此紆死物

猶希利耶叱左右逐出之諸部震恐郭蘇達勒割南市城以獻公請因其入地竝酬殺雲丹之功乃拜爲順州刺史是時斥地寢遠因增築弓門至威遠凡十寨浚隍三百八十里列亭障繕橋梁屬于州門皆戍兵餘功民不知役墾詔褒寵焉俄丁內艱上以雲麾將軍奪服初戎人有殺王民者率以戎法入羊馬償其家邊人愁苦公下令曰戎人自相犯從其俗犯華人論如律于是蕃渠斂手而民有更生之賴且勒斯資乘諸豪未安因率衆號十萬脅餘黨寇三都谷公率兵迎擊破之斬首千

餘級獲馬牛雜畜器仗三萬計逐北至沙州乃還改客
省使領康州刺史充本州防禦使及加秦州部署充涇
原路安撫使天禧元年春宗噶爾人復使其將馬布札
爾屯野吳谷公夜遣壯士鏖其營獲人馬甚衆戎師潰
是歲州民狀保鄣鎮靖之迹聞于朝願刊石頌功以信
不朽天子手筆褒諭古哩羌恃衆逼塞歷年招撫無內
屬意公潛師襲其廬滅之渭川河州諸羌皆惶恐請降
且勒斯賚知外援衰落于是竄還故地俄被召歸燕見
勞問恩禮蕃渥三年復拜華州刺史充本州觀察使郵

延路駐泊馬步軍副都部署環慶路緣邊巡檢安撫使
慶州羌烏爾勤郭勒敏特你等族千餘落詣吏歸欵因
撫之使爲外禦邊略益安四年春正月崇拜宣徽北院
使鎮國軍節度觀察留後簽署樞密院事是秋忠愍寇
公謫道州嫉正者指公爲黨改使南院以留後機務出
爲環慶路駐泊馬步軍都部署兼安撫使乾興元年春
落南院使降爲容州觀察使知萊州冬改授華州觀察
使知青州天聖三年春進領彰化軍節度觀察留後徙
知天雄軍戎聘歲道北門素稔公威望至飲餞郊勞皆

曲拳畏慄不敢仰視俄奉詔修覲徙知永興軍未上道拜昭武軍節度使加賜褒功之號復鎮全魏踰朞感癘羸之疾輒抗表願治河陽三城以便頤養兩宮優答俞請疾少間議者以威名大臣不宜處閒外裁數月徙充真定府定州路駐泊馬步軍都部署七年改彰武軍節度使部署如故明年正月丁卯薨于位訃聞帝震悼不視朝兩日穉以待中印綬延賞歸躡躡常等由公始終踐歷一出于功名者歟夫人潘氏追號馮掖郡夫人後夫人沈氏號吳興郡夫人諸昆曰瓌殿前都指揮使忠

武軍節度使累贈太師曰瓌終義成軍衙內都指揮使曰珣至昭宣使恩州團練使諸弟曰玆至西京左藏庫副使曰玘尚書虞部員外郎以椒房之親累贈太師中書令曰珣至東上閣門使宜州刺史曰琮今爲同州觀察使三子長曰僖禮賓副使曰倚內殿崇班早卒曰僕供備庫副使一女適今西上閣門副使王德基公端誠壯猷不勉而立知兵好古虛己下士周旋抑畏皆得先王之風結髮乘障至剖符握節出入二紀至于威信所治郡兵不敢恩民民不知有兵功織芥必賞罪秋毫不

九
先
七
校
貸故士皆勸能盡力而爲之用乘機討貳數與敵角隨
衆寡必以捷聞自國初以來扞西夏者皆無公比智數
纖敏應機輒會嘗奕棊便坐外有白羣兵叛入戎者左
右貽愕公據枰算勝徐曰是吾使之爲謀勿復白不數
日亡卒俱爲敵所殺其奪謀制變類此在秦州民多田
訟窮治之皆不能舉其契公知其罔冒因訴亡官記而
自前者除其罪得脫戶千六百賦錢四百萬亟以疏聞
朝議頒下州縣遂爲常制持重示信不以小仁妨大慈
營兵嘗誅值公疾之革親近者乞少寬假以資休祚公

曰刑所以一衆弭亂安可以吾區區之病欲替王法耶
使法替病紓吾罪大矣遽索筆署以殊死議者比古孫
吳而達生死過之惜其中登皇樞未易歲次遭罹巧中
政輟善還使文武之憲弗及究于天下晚鎮常趙痼瘵
寢劇每嗟燕薊之地淪胥敵境願得一銘燕然值時戢
兵卒與志謬齎恨沒地可勝愾耶然而纂服濟美都高
牙齋鉞之重威稜被于殊俗功業見于本朝易師之丈
人詩王之爪牙公兼得焉亦足以暴于夷夏矣初公之
捐館也卜葬不吉歲在己卯諸孤屬圖襄事天子聞之

特詔鴻臚持節有司具本品鹵簿以須其引今日月有期矣飾終二品具于官闕易名節惠請循令典謹狀

故樞密副使朝奉大夫給事中柱國天水郡開國侯食邑一千三百戶食實封二百戶賜紫金魚袋

贈尚書吏部侍郎天水姜公行狀
曾祖道黃不仕贈太子少保

祖頰不仕贈太子少保
父詔仕太子少保右贊善大夫累贈太子少師

淄川長山縣開善鄉青丘里姜遵字從式年六十

八

公之先本齊姓漢以豪傑徙天水後復貫淄右今為郡人焉公幼岐嶷長而沈毅初肄業治百家之言深博自將文藻足用既與鄉物有聲于齊魯間屢挾策于宗司以經濟自任咸平三年真宗始御軒陛延髦秀公以進士擢第明年調登州蓬萊尉治有風力郡將貪其幹用奏請就補本州理曹掾朝廷報可未幾丁內艱免憂闋都銓舉充開封府右軍巡院判官京轂浩穰獄市居天下劇為吏者罕能以課自脫公至則勵直氣探情偽厥

北朝正旦國信使四年冬拜右諫議大夫知永興軍六年春驛召以本官充樞密副使七年遷給事中八年秋感疾請告兩宮馳親使挾太醫相望于路存神省慮形于慰勉九月乙丑車駕親視臥內賜白金三千兩丙寅薨于坊第之正寢上聞震悼復趣駕臨弔制贈尚書吏部侍郎法賻所須率在優等夫人路氏國子博士從古之女封平陽郡夫人公三子長曰居正舉進士早夭次曰延齡太常寺太祝次曰餘慶未仕孫三人曰承顏試將作監主簿曰正顏齊顏及遺奏之上延齡改大理評

事餘慶授太常寺奉禮郎正顏齊顏並秘書省校書郎外孫宿拱之補三班奉職哀榮之數存歿之恩篤矣公天資方重內孝而外嚴家庭之內有若官府性長于吏事濟之以忠力未嘗阿意當世故所莅必震肅所言多指切前後進用皆上所自知又感昔人削藁納誨之箴問樹漏言之誠故闡臺奏議樞機密勿言天下事甚眾世莫得而知云惜乎參基命之司歲律未幾遠猷熙綽弗克究公之素寒暑興沴棟梁其萎然可謂雄駿之寶臣黃中之元吉者已謹狀

督河北軍事屯中山庚午春正月丁卯寢疾薨于位壽五十八訃聞天子震悼不視崇德朝兩日以黃門監璽書告第走命中謁者護其柩還京師後九年寶元之己卯其孤等始以龜筮之吉歸窆封樹有詔鴻臚亞卿典喪事奉常易其名曰武穆冬十月乙酉具鹵薄鼓吹葬公及其嫡馮掖夫人潘氏于南洛陽之金谷鄉尹村原從大墓且言順也先是其家合官牒世譜以狀咨史氏請辭刻石讓不遂乃紉而敘焉公諱瑋字寶臣其先晉有清河太守泓去官寄孥始爲郡姓後裔再徙占數真

定之靈壽曾祖諱業祖諱芸竝遭時俶擾仕本州爲牙門大校職以世及功緣地徧陰邁德美儲爲慶靈以至烈考樞密使累贈太師尚書令謚武惠諱彬以明允篤誠道參運始禽吳越蜀助平天下翊亮三聖卒爲元老諡謀帷幄溢動旂常生極師臣之尊沒從大亨之配顯揚追賁爲時第一逮公之克濟世美及昆弟宗門之貴交荷恤典叢于先報故今繇祖而上皆贈太師尚書令又封曾祖于榮大父于越俱爲國公會祖妣張氏祖妣李氏皆累封齊韓二國太夫人禰廟自始薨飾以濟陽

郡再易冀魯竝爲眞王妣高氏及二劉氏又別以秦齊
陳三國爲湯沐公卽武惠王之第四子也承是休烈生
而岐嶷童齒英發雅爲先王所器至道初以任爲西頭
供奉官閣門祗候黨項餘種李繼遷盜弄朔方兵穿塞
首鼠強吏不能制時武惠握機政太宗面訪雄俊以置
邊瑣久之輒以公應詔帝喜曰卿有祁午安遑遑更索
耶卽日召見命有司加顯秩以俟遣武惠固辭及以本
職試守隴西郡年甫十九公自以見知于父子之際又
爲明主所識拔感激忠孝遂據才蘊由廷臣凡八遷至

客省使其間帶高英康三州刺史團練防禦使各一洊
領華州一降容州皆爲觀察使進主鎮國彰化二軍節
度觀察留後昭武彰武兩軍節度使其化條所莅則戍
鎮戎軍守渭邠秦萊青天雄孟克七藩而渭天雄皆再
其瑞璋之總則環慶眞定涇原三路皆爲兵馬都鈐轄
鄜延路爲副都部署環慶眞定兩路竝爲都部署國論
所咨則領宣徽南北院使署樞密院事命秩之備則階
三品勳二品視官帝傅兼亞丞相書社六千三百實幹
一千六百以四字爲功號烜赫光耀冠映侯籍迹公之

策名展體服勞中外爲國方召多本西畧初繼遷迫誅
寢久劫羣羌爲支輔苛征暴戮人思自拔公之扞蕭關
也盡條恩詔綏懷之意以檄諸部部人得書皆東向感
泣或率衆內屬奸黨始離寇畧河湟諸戎歸重弗戒公
短兵鏖石門川上狡衆殆殲趙德明初喪凶父有首罪
稱藩之請公以天厭餘孽宜時平蕩願帥一隊縛豎子
以釁鼓驛書言狀慮密計周時朝議前已許降謀弗果
用揚珠瑪哈之族合萬餘落乞援內徙諸將惶惑未知
所受公獨撫其使自將勁騎薄天都山凡三日盡擁其

衆按道徐還中外服其勇再守渭也古哩羌寇掠不已
公率所部合支軍趣武延鹹泊川鼓行夾擊諸帳皆潰
係牛繫馬以萬計遂破滅之又襲叛姓巴勒臧于平涼
剪其巢窟自是屬國者倚漢與天等矣鎮天水也值置
勒斯賚初盛挾李遵妖妄自謂吐蕃貴重當雄西域稍
并他部恣睢塞外遵乃傍緣故事上書求贊普之號公
密疏以春秋許外夷者不一而足今二羌烏合而所希
無法宜黜桀驁以尊國防真宗納焉但授遵保順節度
制後果窺伺邊隙包藏禍心迫脅小種扇動豪帥連營

方陣號稱十萬乘虛內興浸淫于三都之谷公率軍整
旅背城逆戰斬首千級獲利器雜畜三萬計追北至敦
煌驍將馬布札爾恥敗負力復屯野吳公遣死士數百
夜擣其壘自相蹂躪羣醜遂奔古哩羌陰謀累年規敗
疆事先其未發掃平盧柵因是西南諸姓皆納款轅門
遵賚震怖遁還故磧不敢彎弓而取當此式遏制勝之
大較故事邊民挾弓矢皆應募爲奔命鬪勞賞薄人情
弗愜公建言能墾境上曠土者蠲其租春秋耕斂出州
兵以護作而戰者忘死矣渠率內屬恩隆無等公請百

帳以上比古幢主次比營司馬贊書拜授列爲王官而
來者知勸矣黠羌殺人輒以羊馬自贖公按律令除其
弊犯華人者論殺之餘從其俗而刑無頗矣秦人田訟
彌歲不解曹吏投隙竄易版書公審其宿奸一取質劑
爲驗亡契者貸其負使得自占收脫戶千六百租錢四
百萬臺符宣告州郡以爲後式而文無害矣此威懷安
利之凡最若其按秦漢舊迹因長城之塹稍築塢堠以
殊內外斥境千里建籠竿之壁列弓門十寨迭爲藩蔽
班賞格飾鬪具繕梁表道屯田足食迄今爲保障之利

者不可悉紀公之在關隴以威名莊重淵回山立累功
懋賞皆卽拜稍遷倚而不召者歲踰二紀至于丁外內
艱泣血委印綬率以墨纁奪服天禧中始有下邳觀風
之拜猶副戎柄時三陲寧晏外虞訖息僉以公壯猷盛
烈當敷及天下于是有留使宣猷之授入筦樞極公旣
踐修世範知無不爲秉義據正勤勞夙夜海內抗頌歸
緇衣之美終以勛高地偪更由總管之任出臨西夏讒
黨乘勝又以容山之拜徙守東藩聖上始初清明誅放
儉猾不俟辯謗寢還舊物奠營丘藩全魏養疾明律興

護北方再陟齋壇終屏王室洪稜勁節久而彌厲方且
桓圭阜馬竚來朝之儀彤弓彫戈將蕃錫之典昊天不
弔殲良奄及此哲侯所以深聞輦之悼邦人所以寄成
蹊之泣者已嗚呼公之材之劭本沈雄而施事幹然承
藉先訓濟之謙慤保功約己未嘗有過臨政精悍不獨
以軍旅從事故數佩州組皆以最聞大指道威信必實
罰以軍之嚴移于郡則肅然畏以郡之愛移于軍則薰
然和伍符吏牘參行不愆古名將之憚公優爲之前後
褒勤賞捷受方底書以數十若其詢逮兵策則寶跗細

劄委曲纖悉甚者手詔往反如宣帝問後將軍故事決而後已在常趙感疹方革營卒以常過千軍禁左右勸寬其罰公曰以病易守非吾節也卒置殊死故公之約所守如介石公之重所至爲長城言料敵則焯龜語應變則奏刀用能英聲茂績超蓋前代行均椒蘭之芬威無藜藿之采有由然也論者猶以羌渾右鄙事微敵脆不足暢桓桓之舉晚睨幽朔悲歌慷慨常謂禪姑衍銘燕然者復何人哉時方弭兵公亦齎志此又謀夫壯士擊劍長懷而不能已也繼室曰沈氏今號吳興郡夫人

故相僕射倫之孫光祿少卿繼宗之女三子長曰僖任禮賓副使次曰倚終內殿崇班曰僎爲供備庫副使噫門闕隆貴蟬聯魚貫以功名世家者今無偶矣游談故老尚將傳而不泯又況圖金刻期陵岸則公之終譽其有旣乎銘曰巖巖常山靈氣磅礴值爲豪英拔秀遼廓洸洸侍中實本渾熊纂服肖善自箕而弓武惠知子獻之天展弗嗇家寶用參國器黨項猖狂擾宋西疆公冠未升戍于秦涼治兵刺部或征或撫游魂殘孽莫敢余侮婪婪大酋交兵結仇率爾蕃部搏我邊州公計先定

聊秉武節螳臂蛙跗卒染車轍蕃族震擣款塞就羈滅
烽臥龍帝曰來歸計功酬績大使方伯乃幹鴻樞柔惠
正直間因讒人旋陟舊勳三偃大藩再帥中軍屏于北
道威聲偃草公侯干城宜壽宜考耳順未踰與世長違
徹我金湯帝曰予思貂廠裘毳哀榮並至寵葬周原陪
先洛涘儼畫柳兮彷彿公將僚兮幽堂惟松楸兮嗣世
尚橋梓于家王

故朝奉郎守尚書駕部員外郎上輕車都尉賜緋

魚袋濟陽江府君墓誌銘

昔班固稱西鄙英雋之域黻冕所興議者以爲一時之
夸辭過矣蓋京師樹首善以倡天下擁太和以陶民性
若堯土之俗多憂思舜野之器無苦窳遷善成教不知
其然則中州人物之華常卓犖于諸夏固其宜矣雍丘
爲左畿大邑氣俗尤厚士之挾經術由鄉校脫野巾而
襲朝組者視寰內不若也其間尚書郎濟陽江君諱日
新字仲元又章章者與君端拱初以明經登科調補陵
州始建尉由外臺陟狀就除成都司法參軍入爲大理
寺法直滿歲改評事出知曹州濟陰縣轉運使河東薛

公映上其課最就徙同判撫州摘姦卹隱示歸厚之法
其後吏民多奉行江君故事就轉國子監丞真宗嚮明
改丞大理秩滿除太子洗馬同判鄜州咸平初匈奴未
賓侵敗邊略天子念兩河之棘特詔有司選中朝臣有
風績明劭知下疾苦者不問其位付使節以安輯之時
君適自郵歸繇是以春官五品領河北安撫採訪之任
疆場方駭政靡事易農不狎野吏或失官輅車所經輒
振其弊使還論奏上皆俞可俄除同判并州會平原守
王用和治迹無狀爲使司所劾奉辭之日面改知德州

遷殿中丞賜緋魚至州建言城小不足以扞寇願率衆
力而侈大之朝嘉厥謀民亦胥勸樓堞未備戎入其郊
時趙魏諸強藩皆堅壁自完不內細弱惟平原虛城納
衆料丁壯以操戰具開東西門使士易服出入晝夜不
絕敵衆憚之被圍三旬守有餘力凡獲馬口甲胄以千
數獻于行在民賴保障者數十萬人上錄其勲改國子
博士俄丁父憂有詔奪情復攝郡事秩滿吏民守闕願
復借君一年故歷四朞而得代還朝除濮汝壽三州不
拜上書願治邊郡會邊瑣無缺守遂同判真定府改尚

書虞部員外郎府帥滕文襲木强少文條教自任君數
援吏法以裁正之乃挾刑獄使陳綱翟繼恩奏君以當
官失和傳致疑狀朝廷下其章于本路計使以辨之君
具陳所諍皆公言他毋纖芥由是陳翟俱得罪移君同
判大名府又移邠州序遷比部員外郎太夫人在堂表
乞就養俄除知扶溝縣數月復移同判齊州轉駕部員
外郎自陳翟之誣爲居中者所惡數易官守將逞憾于
君君自以婞直多忤不容于世乃以末疾自劾免時長
子爲尉氏主簿遂往就焉痾瘵寢加以大中祥符六年

四月二十八日啓手足于牖下春秋五十七曾王父瓊
烈考延濬潛德不仕教忠詒法逮君之顯贈其禰爲水
部員外郎母李氏敘封隆平縣太君初娶富春孫氏繼
室以汝南周氏封內鄉縣君後君三歲而卒五子曰中
古進士擢第爲綿州從事曰中和守家學爲鄉老所薦
曰中庸有高才而天曰中應富辭業未第曰中立登俊
科掌宣州記室初君之終諸孤等以筮之未從而歲之
不易故藁葬君于南部今龍集癸酉孟冬之己酉吉與
姓會始號奉靈輜及二夫人之喪克葬于雍丘縣陽夏

長白岡之原禮也惟君感慨強濟由徒步而取時舉其術長于機變而兼敦義烈今天下積年逋田許賦他戶著于令乃君所建又邊民蔡靜恭者父爲賊劉廷晏所殺後廷晏仕契丹爲涿州別校靜恭旣壯出塞斬之以首祭父墓君表其孝勇章數上靜恭卒授三班奉職其樹風竦善他多此類固當驚擊橫騰夷夏而薄霄漢終乃婆娑郎署沈浮郡竹外失貴臣之意奄同萬物之盡道遐運促可勝嘆哉然松心不彫井德無改剛腸勁節終始彌厲亦足以矯抗羣枉詒燕後昆者焉其孫休

復童牙有文弱冠而仕與余聯第榮牒敦契鄉枌具狀先猷丐識圓石罔獲辭拒姑實其狀云銘曰日畿之藪風夷土厚秀龍乘乾回岡包酉龜食告祥牛眠啓後葬君子兮佳城備大夫之廣柳物共盡兮奈何德有基兮可久岸爲谷兮谷爲陵期信辭兮垂不朽

宋故朝請大夫尚書工部郎中充天章閣待制上輕車都尉賜紫金魚裴彭城劉府君墓誌銘

景祐乙亥秋八月天子制詔丞相曰朕思得忠廉老成之人參備顧問其疇宜哉僉曰尚書工部郎中劉隨有

史魚之風於陵之清直方秉彝節貫華皓帝曰俞翼日以冬官待制天章閣褒言渥禮形于書贊搢紳動色有得賢之賀未涉旬慈生心腹日臻無損越九月旣望家老奉祭衣以號東榮時髦端士相與流涕朝廷恤憐厚賻終錄孤之典仲豫庚申歸葬于開考城之黃城原禮也君字仲豫其先漢楚元王之後十三代祖諱思立仕唐爲右武侯大將軍襄武郡公衣冠慶靈宗牒詳具大王父利賓王父運皆占籍睢水烈考濟以石晉之攝始居神甸逮君通貴累贈尙書刑部郎封妣侯氏爲永安

縣太君其高曾以還亢宗避地之節悉見于君自撰先人之誌此皆不書真宗景德初君始以鄉秀詣春官覆試便殿擢進士第解巾連主安豐仁和二縣簿又調倅永康之壁屬邑令有受賂易死生之獄者君正其誣枉將抵令罪漕使李士衡陰爲之請君終不答士衡怒密奏君苛燒非綏邊術坐是代歸仍閱冬集久之補南劍州從事丁內艱服除改大理丞參主詳斷時宮保文元晁公以重德處辭禁朝夕獻納雅知君風力強毅手疏稱薦因是出通判益州益號會藩故事非外朝臣不俾

爲貳洎貪君才劭故以京司命之延登臨遣恩禮無殺
就殿中丞移原州今上繼明轉太常博士關掌河中府
未幾驛召換左正言囊封盡規爲相國文穆王公不悅
會京府秋薦命君邏察試席入榮進士有一辭異卷者
亦旣構訟抉以爲疵左遷掌濟州商筭明年移監平陽
郡秩滿序涉左司諫入計省爲戶部判官賜緋魚以疾
上書得濟陽符竹政成稍遷起居郎判戶部勾院未踰
月改尚書刑部員外郎兼御史知雜事仍副都銓九流
之柄加服金艾涉畚以兼官介銅監使務明道建元遷

秩七兵是冬持節使龍庭出塞冒霜露足力孳痺至其
廬單于命無重拜還臺有司以爲不敏降秋曹承務典
信州尋復舊官徙宣城郡數月拜今秩知應天府兼付
宮鑰被召赴闕再居地官之造裁半歲乃貼禁嚴之職
凡歷官十三受任十五雖命有仲屈而道無磷緇精心
強力果子樹善其佐幕于道江也異政犖犖最爲可述
軍有宣父祠富人穿廟墻爲賈區以出公算君下車卽
移書譙主者奪其地春秋率博士弟子釋奠如常禮由
是裔民識師儒之教壘中有李冰遺像名載祀典而遠

方右鬼因爲煩費歲斂閭左出私錢以給賽且至數千
皆先神禱而後國賦財用旣積官爲簿受而吏得傍緣
乾沒君尤之曰神賢者也生以扞患利茲土而沒以血
食害斯民耶非聰直之意悉罷之俗不爲井食于江涘
霜嚴波涸則水去軍署亘二十里緆缶係道官民愁苦
君乃洞竹萬箇引近山之泉因地湧伏徧注官寺鑿空
甃數十儲華清以汲鄜里舊城有疆域無雉堞歲課民
斬木爲虎落地又多火連甍恐懼君乃環植官柳數十
萬櫛比交錯旣已限鬱攸之烈又相疊以成援人到于

今賴之岷源與沱川竝流勢欲橫潰君規治長堰二百
丈障狂波趨故道自成都十三縣竝免其危西南夷以
馬市邊關爲駟僮所欺君繩其宿奸夷人悅服及後以
中傷罷去鬻髦千餘人遮使者車呼曰我劉父何在本
部以聞君始得再調丞于鄉棘也值李溥之劾辭多詆
譎溥始以商利得幸黨連貴要至是牘背諭指惡不悉
暴君上書卻其獄究其奸態有詔再訊卒至重科明邪
翕翕無少畏憚居諫署也志拾遺漏以箴朝禁教坊舉
伶籍之缺有命蜀部輸送善優君建言聖主方追三代

之隆斂才聘士孜孜如不及奚復遷明詔求賤工非所以廣德聲于天下疏奏帝悅遣中黃門申諭且勗以無後言之隱莊獻太后敦外家之愛幸小侯之第上封援古兩宮咸動自是終其世不復再駕他或譏其心倖條其善否削藁奏御尚數十百函沃心中理多蒙褒答今參預貳卿宋公之去內署也以建白許旨換職守南都君時副總憲綱亟上言善人邦國之基禮樂之宗不宜外斥以孤人望事雖中寢朝議韙之四爲州藩皆宣威導慈推行靡密大指破狡蠹緩瘠瘼防檢刀筆下無能

欺便俗垂制必圖終永外臺倚重常爲二千石表出內風績始終無懈然剛腸寡偶矢言好盡根于忠義折而不撓凡所建明必欲蹈遠猷而遺近利是則希遷難進其樹立使然耶惜乎見識于後凋之餘開榮于晚節之會道悠命局終淪舛躓不弔昊天齋志沒地嗚呼春秋六十有五先是君聘敵之復也有馬十五乘悉上送官主者因其外遷不時還賜及葬輜庀具家資窘絕上聞之特出庫錢一百二十萬追酌其直服勞處約歿身彌顯夫人張氏以柔嘉輔作啓壽昌爲湯沐邑三兄曰治

平巽巽以君故仕為大邑佐洽隱居平早天一子孝忠
 任大理評事一孫慶餘試祕書正字僕與君篤鄉枋之
 契接朝紳之舊危言雅行稔于心耳又以嗣哀狀遺烈
 見託斯文輟慟含毫辭實無愧銘曰噫嘻仲豫志靡回
 昂昂邦直卿之材飲冰樹政惠可懷握瑜屢黜心無猜
 生涯將究時甫來天意難忱賢者衰寧神降體掩夜臺
 瑒辭沈碧揚清埃

宋故右班殿直郢州兵馬監押贈太子右清道率
 府平昌孟府君墓誌銘

府君諱仲宣字坦之其先出魯卿之宗為平昌望族世
 系寢遠不常厥居士斷于梁多歷年所今為開封人也
 曾王父迪王父守中皆蹈道不仕以貲徙于京邑考處
 讓幼號文敏喜刀筆初襦巾入公府極右署太宗皇帝
 毓德宋邸尹正神縣遴揀左右宣贊音旨繇是以閒練
 儀矩改補王屬出則先馬入則侍帷倚賴親信宮臣欽
 矚雍熙踐阼以舊恩連宰劇邑終洛州淝鄉令君則其
 冢子愿慤華穎發于羈貫及長治書術好文藻嘗一貢
 春官氏淝鄉之捐館也占遺牘以聞上天子憫焉即以

君爲三班奉職官未及蔭而賞延于世非常例也君以
父任尤感慨首公盡節奉承王事其間馳輅將命者十
數反無懈色商功守局者凡再任多允課以勞補右班
殿直監兵于郢川咸平四年十二月二十三日不幸感
疾啓手足于解舍享年若干歲娶王氏晏氏皆早卒又
繼室張氏二子曰陶曰某晏出也某未冠天闕陶天禧
中擢進士乙科歷郡掾邑丞爲公卿慰薦遷祕書省著
作郎今爲本省丞知扶溝縣初府君以廉儉宿業屈淨
齡而無貴仕貽燕訓道造次必于儒者宜有慶善叢于

後昆故祕丞襲是素基攄厥休問載質未幾通籍于朝
今上東耕禮成以辛未詔書贈府君爲太子右清道率
府率封張夫人爲永安縣太君綵衣承顏士林聳慕噫
垂裕顯親之致其相爲美乎先是東部枌榆卜窆者重
世矣祕丞君永懷先正藁葬之久又感故塋昭位之卑
卽于所治改占塋域上書言狀有詔可焉參問著龜得
景祐甲戌十月癸酉惟卜吉于是奉府君及二夫人之
柩合葬于扶溝縣之白馬原竭誠慎終禮無違者夫江
源濫觴而派爲南紀臺興累土而高極九層前蔽世烈

鬱抑憑厚發于來裔庸可度思嗚呼孟氏之子將光顯于時矣美也不佞辱祕丞之知勤請斯文以誌幽隧銘曰君子含章蘊隆善祥安節効用其功弗揚志則藏兮令嗣追遠褒榮恤典肯構充閭其言克踐世將顯兮神革之畿連岡蔽虧寧神卜兆紀實刊辭魂有知兮

墓記

宗室內園使忠州刺史殤子故右班殿直墓記

殿直諱克威無字始賜名且未冠也內園使忠州刺史承鑿之次子母曰臨淮君劉氏初宣祖之昭曰秦悼王

之子曰保平軍節度使鄖國公德鈞鄖公卽忠州之烈考今上之諸從父也惟國積累憑厚固槃石之宗仙源慶厓派分枝附天子以爲三后之屬籍九廟之孫謀凡親親之恩率過乎厚于是殿直生三歲矣未能勝衣趨拜而服庭臣之命景祐甲戌五月癸酉不幸天闕卽權殯于佛祠今官占告猷得乙亥孟春丁酉吉因其庀尊屬之葬具詔以殤禮祔焉實汝州梁縣之先域也噫託封樹寧體魄庶幾從乃祖于下乎謹記

宗室內園使貴州刺史殤子墓記

殤子者宗室內園使貴州刺史承裔高密郡君韓氏之
 第五子保平軍節度使即國公諱德鈞之諸孫秦悼王
 之曾孫天聖辛未生于宮邸以景祐甲戌七月丁未卒
 年四歲初以貴州之愛免懷辟咄就嬉于姆保故未及
 賜名以皇支之蕃辯族疏寵次上于官簿故未之逮祿
 歲在乙亥正月丁酉舉其襯耐窆于汝州梁縣之封兆
 從大墓且吉卜也夫承九廟之覆露宜參麟趾犬牙之
 雜襲苗而不秀其命矣夫表于幽阡用篤終禮云爾謹
 記

宗室懷州刺史殤女墓記

故秦悼王之子曰高密郡王諱德恭高密之子曰懷州
 刺史名承慶懷州于今上有再從昆弟之倫天祚所開
 國姓蕃衍殤女者即懷州之配涇陽郡君和氏之所生
 第在十一景祐元年夏仲甲申天子于宮邸距始生凡三
 歲即以其月寓骨于延祥佛廟天子至仁睦族湛恩漏
 壤每宗支遭戚丘封葳事必卹然加厚辨圖按域厭祭
 畢舉窀穸就安斯所以厚邦風篤天屬也故因其諸母
 之葬耐窆于汝州梁縣之先域得從祖歸全之義嗚呼

順哉時二年正月丁酉謹記

祭文

祭孫僕射文

唐季俶擾皇綱弗競俗頽厥風人非其行於皇時宋天
 集大命下武繼文如周之盛嚮學首善稽古作聖必有
 儒宗緝隆醇政公稟英粹挺然天資靈磨威鳳瑞我昌
 時含章履素居中稟彝仲尼既沒文不在茲有德可樂
 為邦家基有道可尊為王者師有行可法為生民規有
 容可觀為朝廷儀昔公始仕墳籍是司濟濟學徒發篋

掘衣洗洗天族學易受詩乃升內閣前席詢咨直言正
 色介然不移德玉自潔讒蠅莫緇列藩偃息風教下施
 甘棠勿拜去為民思聖皇纂御累洽重熙入居講勸十
 稔于斯義重師傅多所發揮典章禮樂時庸稽疑士任
 國用援薦罔遺君從人服以其不私日昃歲晏眷然懷
 歸引年還政安居委蛇進退合度始終有宜嗟嗟耆德
 天不憖遺邦殄瘁兮人亡吾安放兮哲萎納書褒述揆
 于禮闈易名取善與聖克齊陽穀之野汶水之涯令嗣
 卜窳神降來依昌朝早以謏材為僚東序駑蹇之價重

于一顧曷堪厚知猥煩清舉暨玷經筵公指館宇嗣講
舊編叨榮懷慕某本諸生得游材館示以槩模假之羽
翰比名言路抗章敷薦陟被上庠遂階清貫撫躬悼恩
心誓旦旦希言早歲進擢左雍授經王府引籍殿中中
和晚進被遇攸同昔登學省今傳皇宗豈不懷德銘此
微躬方阻門闌各服官次靡皇執紼遐伸奠饋靈兮如
在俯昭誠志尙饗

元憲集卷三十四

元憲集卷三十五

祝文

上辛祈穀祀昊天上帝文

斯民之生實賴嘉穀亦有高廩國乃乂安敢伸虔誠仰
祈昭貺

冬至祀昊天太祖皇帝配位文

受命造邦奄有區夏配天立極功冠百王昭報之誠敢
忘祀事

宋

宋

庠

撰

太宗皇帝配位文

繼昭聖德載續武功聲教誕敷丕冒土宇奉茲常祀以昭獻誠

南郊昊天上帝祝文

維景祐五年歲次戊寅十一月癸巳朔十八日庚戌嗣天子臣敢昭告于昊天上帝伏以燾育羣生總握元命降衷孚佑明威有赫司牧之重實繫乃眷升中備物疇敢弗祗臣猥承基圖仰荷臨鑒宇內方外咸循厥理天正二元躬率郊報序神綴食用蠲大事精誠所嚮居歆

靡忒開錫純嘏永綏兆居謹以玉帛犧牲粢盛庶品備茲禋燎祗薦虔心皇伯祖考太祖啓運立極英武睿文神德聖功至明大孝皇帝皇祖考太宗至仁應道神功聖德文武睿烈大明廣孝皇帝配神作主尚饗

南郊皇地祇祝文

伏以博靜之宗持載攸主順配乾理參儲靈命廣生含厚理絕名言臣獲以冲眇嗣膺宗緒蕃釐所祐日以靖嘉歸報明察不敢有貳長景協序庶物畢登親陟泰峙肅將祀事率典盡志欽惟格思無疆之休申錫攸冀

南郊配帝太祖皇帝祝文

恭以天有景祚集于元聖聖有成訓垂厥後昆於昭武
功建我炎統勝殘去殺輯寧戎夏宏模顯道燕詒罔極
施于寡昧仰席慶靈守成任重日以增惕敢緣類饗陟
配郊丘親執豆籩對越穹厚孚佑敷錫祈庇本支

南郊配帝太宗皇帝祝文

伏以執競建猷經世垂統思文顯祖丕烈是承威戡桀
驚恩涵動植爲綱爲紀遂安萬葉曾是涼末庇于孫謀
循規蹈常罔敢寧逸慶祚所衍歲物載豐虔修盛禮禮

宗類帝迭配之重抑惟茂典庶無罪悔以對神休

后廟修築垣壇祭告土地文

伏以別廟闕清外壩崇奧蟻墉漏壤雲鋪戒徒方亟繕
完慮奸禁忌恭陳信祝尙介神休

繼照堂上梁祭告土地文

伏以京室寶區聖真舊邸夙標宏構用志初潛歲歷寢
深堂皇滋漏俾從必葺將慶惟新適涓上棟之辰敢肅
柔祇之薦庶資冥祐永保靈基

開汴口祭告文

繁歛輔渠首茲經瀆控引淮楚饒漕京師泮涸以時開
塞惟謹方春之仲疏派有常圖興庶工參倚靈眷薦嘉
達懇用竚安流

東太一宮立夏祝文四首

伏以天序乘離風薰中律瞻言靖館夙駐奔精祇率舊
章虔修孟祀仰宮元之循度鑒祝嘏以儲休神道孔昭
民生永庇

伏以天序布和炎靈啓律參幹大化實惟尊神至迎氣
有常備物茲恪迺是繁祉庇于羣生精輝孔昭鑒祐無

忒

惟神上棲太穹參握靈紀飛象所舍純福是膺歲時順
祀邦有常典屬戒東序虔率禮章備物薦誠允格聰鑒
伏以茂循星元參宰乾幹嘉氣儲福是惟貴神薦馨備
物厥有常事茲屆邦典紹修恭達潔誠仰對真御奔精
胙吉靈其格思

狀

乞許汝州狀

臣聞事君之方止于無隱遂物之施終于曲成故下情

靡不達之衷人欲有必從之感冒緣明訓控述私悰

謝伏念臣志局狷愚藝文涼淺偶偕鄉物遂玷辭場屬

元聖之協華預羣材之始隗興于孤土寘在甲科首塵
卿屬之榮旋濫朝闈之籍書林抱槩久宿官成財簿操
籌再承人乏間亦質歲期而上課循吏格以懋勤優踐
諫曹參司史注繼獎雕蟲之技入陪演綽之嚴眷會光
亨品儀峻切凡此冒居之地率非平進之階每一內思
罔知攸處將策名之始已濫于衆先而待賢之規忍由
于愚廢固當瘁盡少贖僥踰曾未效于寸長輒更希于

自便益念臣幼鍾薄祐長去先疇僅存喬木之區列占
東畿之版高曾以降丘壘未夷惟臣二親尚從藁葬不
孝之罪陰罰寧逃然揲策焯荆歲時或爽按圖辨位昭
穆寢疎洊失祔于故林實介違于本兆今者訪于輔郡
偶獲新阡惟涓遠日之良乃在此冬之首必祈恩惠親
奉襄成奈何職局有羈營綜多緒俸泉仰給月罕貲贏
僮指招呼門無幹力至乃歛衣靈輅之具祭牢謳紉之
儀雖儉則易周而禮難或闕並資豫辦方克如期事既
痛于弗躬室復嗟于終窆併茲危迫敢避干聞臣欲乞

子許汝二州之中知州一次且謀道出兼便家爲上則指賜田之豐易成假貸下亦賴執衣之助差減僦傭情報獲伸幽明胥濟伏望景祐體天法道欽文聰武聖神孝德皇帝陛下容光燭隱善貸垂慈徇其出守之行訖乃事亡之舉況臣叨塵近掖已越再期參攝事經奉行辭訓荷包荒于聖度偶逃責于刑書均是微勞理當外補攷其劬農求瘼察獄衰征具有綱條布于郡國蓋治規之已定雖愚者而可爲內省闇蒙尚知遵守儻遂一麾之請誓堅九殞之酬意窘言煩覩悸極交干犯宸衷

臣無任祈天俟命之至

序

送河南法掾張子野序

曩余以不肖冒冠羣材之籍同升之士數盈二百其知之深者則清河張子野在焉子野本公族世家席旂常鐘鼎之餘烈卓然異操發于童牙自弁髦爲諸生棄錦紈而襲韋布迺文雅韻根于粹質一上高第無矜色初命徒勞無愠容士友以是服其清和而期之久大是行也以閔憂家府再奉銓檄補河南法掾且參軍事涓日

首路款余告别議者多惜其美才冲守冉冉于諸曹之
次然余有以陰抃于子者可略言之今相國彭城公躬
寅亮之姿保釐西郊翹材開館延天下士又余友人集
仙陳留謝希深負淵雲之藻田曹外郎樂安孫君貫流
略之學竝肅給温裕爲時吏師方左右台儀協贊留務
愛賢樂善求之如不及則子就署之日雖欲埋照自晦
羣公其舍諸惟逃聽薦章揚茂實于朝耳子姑嗇神以
慰離緒而已

諸公留題王氏中隱堂詩序

夫射者工乎中微拙于使人無己譽君子易于遯俗難
乎必時無我用此故尚書度支員外郎王君所以深厭
物累而見縻人爵高風勝韻歿而可懷者已初君以蜀
漢之秀聲馳士林含章緣儒爲世能吏且悼其去里之
遠始移籍于關中英躔上腴歷選其輿結宇植援疏流
藝竹踞窳窳岑蔚之勝別爲堂皇求志命名實曰中隱
每車騎休沐牛酒過家則必釋朝綏而襲野巾御赤舄
以御山履眄柯蔭樾舉觴嘯詠躊躇四顧爲之滿志回
睨印綬若朽楊韁鎖之遺而朝負其能願卒弗果于時

鉅公名卿及士之賢者聞其風而悅之有若內樞丞相
 文康王公親式段廬刻道文以榮屋壁有若左馮貳卿
 穎川陳公篤愛羊豎灑妙墨以題齋榜雍土傳誦號為
 二絕自是今參預小司徒太原王公譙守大宗伯北海
 晏公而下竝賦清什以旌高致星稠霞駁異采同煥絲
 廉磬辨殊音竝雅不遠千里寄聲代貺此其素

案此下原本缺

送成上人序

天聖戊辰歲余嘗過候故內閣中山公始與公門友成
 上人者交臂于席間微言軟音時落耳界自是數與之

會而亟飲其和且慕其畸于人而不與人異也既而中
 山出守淝上師振錫而從之藹然風期深入法樂一室
 金粟有施飯之緣四海彥威領彌天之對勝集未幾宗
 下云亡孤雲匪心飛鳥隨翼背淮千里聿來上都庚午
 冬余茹憂去官屏處寰內思文悲然策足顧我于幽憂
 之中悲心所熏病膜如刮老龍死矣空成麥戶之驚黍
 山頽乎彌感負牆之舊斂容申悼徘徊久之示視世緣
 益足多者一日踵門告别日求贈言余曰儒家者流道
 詩書服人倫足矣安識夫方之外耶而又京師苾芻方

元憲集 卷三
以俗諦罪我將焉用之師曰不也塵勞之與道愛其縛
均焉今夫誦貫花之書服界稻之衣崇布金之利是種
種者于我法乃捕魚取兔具耳苟泥于此雖吾師猶呵
焉彼求封之仁者何害今將相造乎忘言之地乃以言
爲病耶余感其勤因敘其所以而爲之贈

談苑序

故翰林楊文公大年在真宗朝掌內外制有重名爲天
下學者所服文辭之外其博物殫見又絕人遠甚故當
時與其遊者輒獲異聞奇說門生故人往往削牘藏弄

以爲談助江夏黃鑑唐卿者文公之里人有俊才爲公
獎重幼在外舍逮于成立故唐卿所纂比諸公爲多余
雖耳剽有年而求本未獲前年春始得其橐于宗人祕
書郎敏求祕書郎宣獻公之令嗣宣獻與楊爲中表昆
弟文采風尚皆一代之宗師緒立所傳可謂審而無媿
然按本錄但雜抄旁記交錯無次序好事者相與名曰
談藪余因爲撥去重複分爲二十目勒成一十二卷昔
隋有楊松玠紀南北朝事已著此號行于世今襲之將
爲後生所惑輒改題曰楊公談苑其間有云公言某事

云云者皆黃志也楊于國史自有傳唐卿天聖中預修
正史位太常博士直集賢院年未四十卒摺紳痛悼余
昔與之善因詳錄之慶歷丁亥孟春中書後閣宋庠書
右談苑計二十類曰聖範曰德量曰風節曰才品曰
武幹曰奇逸曰舊聞曰記異曰雜評曰事志曰正誤
曰各式曰書藝曰方技曰敘釋曰僭亂曰豪侈曰惡
戒曰戲謔曰夷紀共十二卷

王侍郎集序

夫古君子之治性情保純白必有凝神寄適之地以完

天守雖見異物莫得而遷焉故詹何老于餌魚佝僂巧
于承蜩承福以巧聞造父以御達彼皆自得于內而不
知老之將至尙書兵部侍郎太原王君之于詩也亦猶
是焉惟君樂易清和膚敏肅給由咸平中名在秀牒聲
馳士林脫巾逢辰累課通籍推行緣飾皆本儒雅標尚
所寄于詩尤邃臺閣髦彥居多蘄嚮君亦操清機襲妙
境求仁斯得不撓世務其間雖登高感別臨年悼往或
鞅掌官下或淒涼酒所春庚秋蟀之候芳茗宿莽之變
莫不造與端緒揣侔聲色悲欣萬態一納于風什警音

秀句隨意所指其雋如破的其熟如奏刀當茲之時誠有三旌之招萬鍾之豐不吾易也故君興逢掖至鳴佩補吏三紀默焉難逮隱侯握臂南宮白首區區榮悴攻中焚和卒莫能緣憂端犯六腑者信其詩爲蔽矣若夫指事之的切賡歌之婉媚衆體參具餘絢相鮮皆可以粉澤中情衣被來者至于玩而無斲味之逾旨則啓卷者可知不待贊而顯僕曩自童齠事君子無容之黨優評定價均于著蔡及此承命且俾冠篇銜知感舊欣榮參半因輒推君之所以好逮名之所以立皆詳言之亦

康成譜詩之義也凡古律若干首離爲若干卷列于左
方云

元憲集卷三十五

元憲集卷三十六

宋

宋

庠

撰

記

台州嘉祐院記

建塔廟散香華奉經典攝受妄迷而為功德有為者為
 之雖然佛滅度二千年世與法交相喪濁劫下根誅為
 愚冥非廣示像法無以震動而傾駭之使趨善良神道
 化時叵得而已沙門長吉當茲世為功德者也初師以
 釋子之秀來上都會譯場高選義學僧敷演祖教名在

籍右始與龍象爲徒而覺華餘光注射物境頗作歌詩
雜擬輒自翼其宗由是益爲人聞俄詔賜紫方袍號梵
才大師勝流欽風多所延供久之厭著謝去復山林之
遊歲在降婁始還台州州守悅其風虛淨名菴以舍之
惟師行嚴而身修寓曠而氣安能示方便悅可大眾居
三年道益光明台人異焉捐金抵璧踵往瞻事四方來
者與麻葦俱乃闢精廬而肆之刊林衡鏤巖椒棘如而
堂蝟如而庭者且數百筵朝薰夜祓供擬尤具九年復
作一成臺置大般若經三百篇及刻千劫佛像彼貨與

力不募自至弗可貲紀師復砭膚取血書維摩經質神
爲要又欲推慧命而廣之乃謀于公卿大人于是龍圖
閣直學士南陽葉君倡始籲謀分繕寶典凡臺閣方面
知名士數十族叢喜迭捨參訖寫庸閱三年臺成約金
奉像皮而安之黑白相趨距躍圍繞以爲去聖滋遠有
能駕其說植德于人令夫威神巍巍現前如親炙面命
不在是經乎因是經讀誦悟入培五緼泯空色攬萬異
爲一真其爲福又可稱量耶僕頃與師遊樂其誓願之
就且枉錫顧我丐辭以永傳因宣是義而偈之曰臺屹

而崇摧我慢而恭兮經華而精竦我怠而誠兮像嚴而顯破吾魔而善兮報我四恩常不滅而存兮師聞之謂余言為信若其營綜之烈投施之衆日月之謹大槩具之至夫筆不可文言不能宣者僕與師均寄一歎而已

奉贈緹巾集記

余幼學為文允嗜篇什而不能工也然性習所牽為之

不已往往應和出諸公間輒為名公訓獎余與子京初試吏罷歸中

山劉公子儀見素近詩因各獻一編他日劉公取當世文士古律詩作句圖置齋中人不過一兩聯惟余兄弟所作獨占三十餘聯雖以課雜發亘以歲月然每自陋自是劉公深加訓獎

其辭未嘗綴緝叢章墜橐亡逸頗多一日忽得新舊詩十餘卷于几案間乃小兒充國等所次覽之不覺掩口胡盧而笑謂之曰此燕石也與瓦甃無異雖緹巾什襲庸足寶乎命亟去之兒曹懇祈留于舍中弗廣布也因取持橐近侍出入藩輔至守鄭日所賦姑為限斷兼以志擁旄之歲云凡五百餘首勒成十二卷命曰緹巾集莒國公記

碑銘

成都府新建漢文翁祠堂碑銘

蜀之廟食千五百年不絕者秦李公冰漢文公翁兩祠而已冰爲蜀繫離堆逐悍水以溉所及常無旱年西人德之因言冰身與水怪鬪怪不勝死自是江無暴流蛟蜃怖藏人恬以生故侈大房殿歲擊羊豕雉魚伐鼓嘯籥傾數十州之人人得侍祠奔走鼓舞以娛悅神祝已傳遐而後敢安翁之治蜀開學校以詩書教人澡髮故俗長長少少親親尊尊百姓順賴其後司馬相如王褒揚雄以文章倡張寬以博聞顯嚴遵李仲元以有道稱何武久爲三公漢家號令典章赫然與三代等蜀有儒

自公始班固言之旣詳初公爲禮殿以舍孔子及七十二子之像殿右廡作石室舍公像于中晚漢學焚有守曰高朕能興完之後人又作朕像進偶公室歲時長吏率掾屬諸生奉邊豆饗醪薦于前虔踧謹潔一再奠而退辭無敢不信焉冰以功公以德功易見德難知故祀雖偕而優狹異焉嘉祐二年余知益州往款公祠至則區位湫偪埃蝕垢蒙不稱所聞大懼禮益懈忽神弗臨享其明年乃占學宮之西正位鳩工弗亟弗遲作堂三楹張左右序及獻廡大抵若干間布尋以度堂累常以

度庭疏牕以快顯壯闔以嚴閉采有青丹壁有級夷瓦
密棟彊若棘若飛乃肖公像于廳間繪相如等于東西
壁本古學之復莫若朕本今學之盛莫若樞密直學士
蔣公堂故繪二公于其間皆配祠焉于是擇日告成于
神揖而升簋俎果湑脯脩紛羅而有容可以告虔趨而
降鬯尊巾洗席燎竝施而不恩可以盡儀相者循循任
者舒舒禮生于嚴廣靈妥于閒寂故也噫自公之來蜀
之人自視若鄒魯宋興名臣鉅公踵相逮于朝先帝時
巨盜再作亂弄庫兵爭劔閣是時蜀豪英無一汗賊者

羣頑愁窘不容喘而滅非人好忠家知孝使然耶所使
然者不自公歟傳曰非此族也不在祀典公在之矣則
是祠之作願自余而古無俾壤息云祠之興同尚之賢
則轉運使趙抃及提點刑獄使者凡三人贊輔之勤自
通判軍州事祝諮以降六人營董之勞自兵馬都監毛
永保而下二人咸畫像于西廂列官里于石陰云銘曰
公二千石兮守大邦冠峩峩兮紱斯皇出有瑞節兮車
騎羅石室孔卑兮人謂何新堂翼兮耽耽庭廣直兮序
巖巖吏奉承兮不譁神來格兮此其家儼羣賢兮竝陳

公所教兮如其仁庖魚脰兮俎肉鮮神來享兮憺蜿蜒
公教在人兮無有頗蜀賢不乏兮才日多俗祥順兮孝
慈公祀百世兮庸可知

連珠

連珠一首

山有榿梓之材居山者芟草而舍田有禾稷之實力田
者半菽而飽廐有驥驂之乘掌廐者羸股而步此所謂
役于物者智不逮乎物也無木者有華棖之蔭無田者
有嘉穀之享無廐者有上駟之御此所謂役物者智包

乎物也故君子逸于用德小人勞于用力

論

丙吉論

昔丙吉之相漢也出見死傷而不問見牛喘而問之人
或譏焉吉曰人鬪相殺長安令京兆尹之職歲盡丞相
課其殿最奏行賞罰而已丞相不親小事非所以道路
問也方春少陽用事未可暑恐牛近行用暑而喘此時
氣失節三公典調陰陽職當所憂是以問爾播厥前史
著爲話言流風未渝來者胥效余恐慕其名而失其實

誑于前而惑于後也可無辯哉請舉其略萬物紛錯最靈者人二氣休咎所感者政人和于下則天從于上政敗于國則氣沴于時孝婦就刑三歲爲之不雨冤囚呼獄九夏以之降霜且匹庶存誠猶足感天地之怒而普率御能無損陰陽之和由斯而談則羣鬪死傷非小事也牛近而喘非精察也漢家之制丞相無所不統上則建道德明禮樂以輔天子次則秉法令申詔條以率百官下則省征徭恤鰥寡以綏萬姓傳曰天子之宰通于四海其是之謂乎非若占筮卜祝之流區區以陰陽

爲職也夫死傷橫路是生殺之不禁生殺不禁是教化之不立教化不立然後陰陽失其序陰陽失其序然後寒暑乖其方寒暑既乖則萬物皆失其性矣寧惟牛喘乎吉徒知暑近而失時不知政敗而傷氣徒知小事之不問不知庶職之已墮昔一人向隅堂上爲之不樂一物失所隍中爲之軫慮況疆口蔽道生民絕命內無惻隱之志外無賞罰之令乃曰待歲盡以舉殿最則冤濫之積所傷多矣愆伏之患其防後矣武王扇暍事非大惠而天下歸其仁成湯祝網理非宏業而海內從其命

若吉之意則二聖者不當于道路問也必謂一畜之喘可辨乎寒暑則良民之死反不害于陰陽斯益見慕變理之虛名失彌綸之大要言無所據事無所稽玷經邦論道之猷取貴畜賤人之責詩曰白圭之玷尚可磨也斯言之玷不可爲也其丙吉之謂乎後之者或以不撓物務爲高不治政事爲達生靈殄瘁移過于有司巖廊拱默自安于高位晉魏而下清談喪國者未必不源于是也可譏也哉故牛喘之祥由人事而來也爲國者未有先寒暑而後敷政教余又不知問喘之後欲何術以

調之必若推精禋之源攷幽顯之效解二氣之相沴通四時之大順非求之于政視之于民則無以動天地而感陰陽平邦國躋仁壽今吉舍敗政而不問而欲氣之順若雖伊臯弗能也見死命而不恤而望時之和若雖稷契弗能也舍本徇末何其悖哉

說

蠶說

里有織婦著簪葛帔顏色憔悴喟然而讓于蠶曰余工女也惟化治絲枲是司惟服勤組紉是力世受蠶事以

元書集 卷五 八 繆晉校
蕃天財爾之未生余則浴而種以俟爾之旣育余則飭
其器以祇事爾食有節余則采柔桑以薦焉爾處不恩
余則弭溫室以養焉爾惟有神余則蠲其祀而未嘗黷
也爾惟欲爾余則趣其時而不敢慢也爾欲顯素絲之
潔余則具繰盆澤器以奉之爾欲利布幅之德余則操
鳴機密杼以成之春夏之勤髮蓬不及膏秋冬之織手
胝無所代余之于子可謂殫其力矣今天下文繡被牆
屋余卒歲無褐緹帛嬰犬馬余終身恤緯寧我未究其
術將爾忘力于我耶蠶應之曰嘻余雖微生亦稟元氣

上符龍精下同馬類嘗在上世寢皮食肉未知爲冠冕
衣裳之等也未知禦雪霜風雨之具也當斯之時余得
與蠕動之儔相忘于生生之域蠢然無見參之樂熙然
無就烹之苦自大道旣隱聖人成能先蠶氏利我之生
蕃我以術因絲以代毳因帛以易韋幼者不寒老者不
病自是民患弭而余生殘矣然自五帝以降雖天子之
后不敢加尊于我每歲命元日親率嬪御祀于北郊築
宮臨川獻繭成服非天子宗廟黼黻無所備非禮樂車
服旂常無所設非供祀無制幣非聘賢無束帛至織至

悉衣被萬物女子無貴賤皆盡心于蠶是以四海之大
億民之衆無游手而有餘帛矣秦漢而下本搖末蕩樹
奢靡以廣君欲開利塗以窮民力雲錦霧縠之巧歲變
霜紈冰綃之名日出親桑之禮頽于上災身之服流于
下倡人孽妾被后飾而內閑中者以千計桀民大買僭
君服以游天下者非百數一室御績而千屋垂繒十人
漂絮而萬夫挾纊雖使蠶被于野繭盈于車朝收暮成
猶不能給況役少以奉衆破實而爲華哉方且規規然
重商人衣絲之條罷齊官貢服之職衣弋綈以示儉襲

大練而去華是猶捧由堙尾閭之深覆杯救崑岡之烈
波驚風動誰能禦之由斯而談則余之功非欲厚嗇身
以侈物化勢使然也二者交墜于道奚獨怒我哉且古
姜嫄太姒皆執子之勤今欲以一己之勞而讓我過矣
于是織婦不能詰而終身寒云

于其辭不道其而然其寒云

美賦太賦皆得于之備今將以一占之漢而難其顯矣

以自其分其然也二皆交利于後又難其非若且古

其然也其然也其然也其然也其然也其然也其然也其然也

元憲集卷三十六



律